

**ASO TOFI, 19 MATI 2015**

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

### **ISI FAASILASILAGA A LE FOFOGA FETALAI**

**FOFOGA FETALAI:** Ou te faatalofa ma ofo alofa atu i le paia ma le mamalu maualuga o le tatou Palemene i lenei taeao fou. E talitonu le agaga ma le faamoemoe, o lo o ua alofagia e le Atua le tatou savaliga i lenei vaiaso, e maitauina foi le faafoisia o lo outou soifua lagimaina lelei aemaise lo outou soifua manuia, ia o fua vaaia ia o le tatou faatasi i lenei aso.

E momoli atu le faafetai tele ona o le lavapapale ma le onosai mai pea i le tatou galuega pei ona tatou tolopo ai ona o nisi o polokalame e tatau ona faamaeaina, aemaise foi le taumafai pea ina ia maua le agaga o le faatulagana o galuega a le Fono Aoao, ina ia autafeloa le tatou galuega i lenei vaiaso. E momoli atu ai le faafetai tele i le onosai mai i le paia ma le mamalu o le tatou Maota, i lau Afioga i le Palemia ma lau Kabeneta aemaise o lea tala na atoa i lau Afioga i le Taitai o le Itu Agai, ma le paia ma le mamalu maualuga o le tatou Palemene i lenei aso.

E faafeiloai atu foi i le paia o Samoa ua tatou mafuta, o lo o tatou i ai pea i polokalame faaauau a alo ma fanau a lo tatou atunuu, i le paia o matua aemaise alii ma tamaitai faiaoga aua polokalame faalauiloa a le tatou Palemene i lenei taeao, ia alo i a outou faiva a manaia.

E faapena foi ona faatalofa atu i le paia maualuga o Faauluuluga o Faalapotopotoga itutino o le Malo ua tatou mafuta i lenei aso, ia faafetai le faatasi mai i le tatou Fono.

Ia le tapuaiga a Samoa i ona tulaga faalupe, e talitonu i le pai mai o faamafanafanaga i lau tapuaiga Samoa, e le gata i lea o le tatalo i le Aufaitatalo aemaise i latou o lo o Asuina le Ipuvai o le Ola, e tuuina atu pea le faatuatuaga o le Palemene o lo o au le Atua ma lenei Fonotaga, ona o la outou tatalo faamanuia.

### **LAFO MO LE FAATAATIAESE O TULAFONO TUMAU 100(1)**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA LUPE SOLIAI AIONO NEIOTI SAILELE MALIELEGAOI (Palemia):** Lau Afioga i le Fofoga Fetalai e tatou te auai faatasi i lenei taeao fou i le viia o lo tatou Matai ona o le taitaiina mai o lo outou soifua ma so matou ola e faatino ai o tatou tiute i lenei taeao e tusa ai o le valaauiua.

### Lafo mo le Faataatiaese o Tulafono Tumau 100(1)

E faamalo foi i Afioga i sui usufono, aemaise o le tapuaiga a Samoa o lo o faafogafoga mai i lenei taeao fou i le faaauauina o tatou Fonotaga i le Palemene nei.

Lau Afioga i le Fofoga Fetalai ou te tulai atu e faatu le lafo, *Ina ia faataatiaese a tatou Tulafono Tumau 100 e avanoa ai le faitauina faalua i le aso o Tulafono Tau Faaofi na faitauina muamua i le Aso Lua, aso 17 o Mati 2015.* O le mafuaaga lau Afioga e faapenei:

Muamua, o lenei Tulafono Tumau sa faia tonu lava i le vaitau a o tausaili ni avanoa e lolomi ai ma faitau ai a tatou Tulafono Tau Faaofi, peitai i lenei lava vaitau o le saoasaoa o metotia o fesootaiga ua i ai nei ma fesuaiga o ituaiga tekonolosi eseese e le gata ina ua i ai le tatou polokalame o le muai faamalamalamaina ai o Tulafono Tau Faaofi po o Pre Sitting Briefing lea e faatautaia ma faamalamalamai ai e le aufaigaluega....o Matagaluega ma Faalapotopotoga eseese mo poto mai Iunivesite maualuluga maoae a le lalolagi sa aooga ai, o latou foi o ni polofesa i lo latou foi tomai faapitoa, ua latou masani ai i faiga fou lea ua mafua ai le tatou Palemene e omai e faamatala auiliili ia Tulafono i se aso a o le i fono le Palemene, ma mafua ai ona tatou omai ma ua malamalamai lelei i Tulafono nei, ia se i vagana la le sui usufono e le fia auai i Tulafono ona sau pogisa ai lava lea ma tuufesili soo mai ma avea ma faalavelave i le faasologa o a tatou Fonotaga, ona o le le auai i feiloaiga nei ua faatulai atu e le Malo e faamatala auiliili ai uiga o Tulafono ma uiga o upu o lo o faaaoga. O mea ia a o le i fono le Palemene, e le gata foi i lea, ae ua mafai ai foi ona avanoa kopi o nei Tulafono i luga o Upega Tafailagi a le Palemene mo le lausilafia e i latou uma ua atamamai i le faaaogaina o masini komepiuta o fesootaiga televavave.

O lona uiga, ua matua le toe auala ia lea foi Tulafono Tumau ma ua tatau ai ona sui, ou te manatu e taua tele le vaega lea sui ma toe teuteu, ona o le anava lea o tatou uma o Taitai o le atunu i totonu o lenei Palemene, o le sagai tonu o lau o le fo i le teuteu ma saga teuteu Tulafono ua matua le toe aoga ma soona palapala ai ma tele ai pepa feaveai a le Palemene ona o fesuaiga televavave o le soifua ma auala o lo o faatino ai galuega i nei onapo.

O uiga magafagafa na o le faaaoga tatau o le faautautaga tatau e agai ai i luma lo outou soifua ma galuega faa-Palemene o lo o fai nei. O lo o tautulitamoe nei a tatou galuega o le tausaga faaiu lenei o le Paeaiga e pei ona faatulaga ai le polokalame o Fonotaga i lenei tausaga, e tatau ai ona faagasolo felafolafoaiga o le faitauga faalua e faasee i Komiti o le Maota nei Tulafono Tau Faaofi mo le latou iloiloga ia ma toe lipoti mai ai i le Fono Aoao ia semeamanu o maua le avanoa.

Lau Afioga i le Fofoga Fetalai ma le mamalu o le Fono, o le lafo ma o le mafuaaga lena o le lafo puupuu lava ua tuuina atu i lenei taeao, ina ia atili malamalamai ai ma tatou ioe uma i ai.

*Faaluaina e le Sui Palemia, Minisita mo Galuega Tau Alamanuia ma Atinae a le Malo, ma le Minisita mo le Soifua Maloloina.*

**Lafo mo le Faataatiaese o Tulafono Tumau 100(1)**

**Afioga Hon Palusalue Faapo II (Taitai o le Itu Agai):** Lau Afioga i le Fofoga Fetalaií ..

**FOFOGA FETALAI:** Ia le Taitai o le Itu Agai, e te faafaina le lafo peí .?

**Afioga Hon Palusalue Faapo II:** Lau Afioga e leai.

**FOFOGA FETALAI:** Ia.

**Afioga Hon Palusalue Faapo II:** E tulai atu ma le faaaloalo, o lea ua aumai le lafo e aveese ai se tulaga ma se fuaipu taua o le Tulafono Tumau. I lou talitonuga, o mea faapea, e le tatau ona aveesea i se lafo i totonu o le Maota, e tatau ona ave i le Komiti Faa-Palemene o Tulafono Tumau, aemaise o ooooga o teuteuga lea ua aumai nei. O le mea lea e tulai atu ai ma le faaaloalo, e le talafeagai le lafo lau Afioga.

**FOFOGA FETALAI:** O lea o le a ou faamalamalama atua le mea lea e te atugalu ai lau Afioga i le Taitai o le Itu Agai, malie le Taitai o le Itu Agai, o le faasaoga o le faataatia ese i le aso, ae le aveesea i i. O le tulai atu o le Afioga i le Palemia e faataatia ese ona o le aso. Silasila foi i le mea lea sa tau faamalamalama, o aso ia ia e faitau a tatou Tulafono i faiatauga faalua i aso lona tolu e mulimuli mai. O lea sa tatou feagai i le Aso Lua atoa ma faamalamalama afio mai Faauluuluga o Matagaluega ia e faalauiola Tulafono. O lona uiga, ua matua manino ma malamalamala lelei lo outou paia i Tulafono, o le ala lea e le mafai ai ona toe tuu atu i tua o lea ua outou malamalamala, o la foi ua i luga uma o a tatou Website, ona manatu lea ua tatau ona faasolo a tatouí í

Ia se i tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ua fesasai le Taitai o le Itu Agai ona o le matua manino o lau faamatalaga vaega lua, a o le sao lava ia o le lafo o le vaega muamua. O le vaega muamua, e tatau lava ina faataatia ese le mea lea, a, ae faagasolo a tatou faiatauga, aua a le faataatia ese le Tulafono lea, e le mafai ona tatou oo i ai. A o le tulaga sao lava lena, e faatoa sui lava pe a ave i o, a o ala ia o mea o lea e i ai i le taimi lenei. Ia pei la o le vaega lua lea ua fesasai solo ai lava le Taitai o le Itu Agai, ae ua gal o ai le vaega muamua.

**Afioga Hon Palusalue Faapo II:** Lau Afioga i le Fofoga Fetalai o se mea e fia faamalamalama lau Afioga, aua e puupuu lava le lafo pei ona masani ai faagasologa o a tatou Fono, e faataatia ese Tulafono Tumau ae faagasolo, o lea ou te auai i le mea lena, a o le lauga umi lea na fai mai nei, e pei e foliga mai o le a le faaleaogaina, aí í í ae le fai pea le mea pei ona masani ai.

19 MATI 2015

**Tulafono Tau Faaofi o Fuainumera Faamauina 2015**  
**– faitauga faatolu**

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga i le Fofoga Fetalai, o le vaega lona lua, e le o se lauga, o le faamalamalamaga ina ia susulu atu ai le malamalama i e o pogisa e pei o le Taitai o le Itu Agai.

*Na faamaonia le lafo ma tulai ai le Tulafono Tumau 100(1) ua faataatia ese.*

**TULAFONO TAU FAAOFI O FUAINUMERA FAAMAUINA 2015**  
**– faitauga faatolu**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tu atu e faatu foi le isi lafo puupuu ma le saasaa, *Ina ia faitauina nei le Tulafono Tau Faaofi o Fuainumera Faamauina 2015 i lona faitauga faatolu.*

*Faaluaina e le Sui Palemia, Minisita mo Pisinisi ma Alamanuia ma Leipa.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**FOFOGA FETALAI:** E faasilasila atu ua maea ona faagaso le Tulafono Tau Faaofi o Fuainumera Faamauina 2015 i le Palemene ua potopoto ma ua faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O LE PULEGA O TUPE A LE MALO 2015 - faitauga faatolu**

**FOFOGA FETALAI:** Tulai mai lau Afioga i le Minisita o Tupe.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ua ou tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Tupe a le Malo 2015 i lona faitauga faatolu.*

*Faaluaina e le Sui Palemia ma le Minisita mo Tupe Maua.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**19 MATI 2015**

**TULAFONO TAU FAAOFI O TEUTEUGA O LE TULAFONO O ASO  
MALOLO MO TAGATA UMA 2014 - iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai le Afioga i le Taitaifono o le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa.

**Afioga Hon LEAUPEPE TOLEAFOA APULU FAAFISI:** (Taitaifono, Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa): Faafetai mo le avanoa i lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faofi o Teuteuga o le Tulafono o Aso Malolo mo Tagata Uma 2014 faatasi ma le Faasaoga.*

*Faaluaina e le Sui Palemia, Minisita mo Atinae tau Alamanuia ma Galuega a le Malo ma se tasi o sui usufono mo Faasaleleaga Nu. I, Afioga Hon Gatoloaifaana Amataga Alesana Gidlow.*

**FOFOGA FETALAI:** O le a sagai atu loa le Fono Aoao i le Iloiloga Auiliili o le Tulafono Tau Faaofi o Teuteuga o le Tulafono o Aso Malolo mo Tagata Uma 2014.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

**FUAIUPU 2: Ua teuteuina le fuaiupu 2.**

*Faamaonia.*

**FUAIUPU 3: Ua teuteuina le fuaiupu 5.**

*Faamaonia.*

**FUAIUPU 4: Ua suia le fuaiupu 7.**

*Faamaonia.*

**FUAIUPU 5: Ua soloia le Tulafono o Faleoloa 1961.**

*Faamaonia.*

**19 MATI 2015**

**Tulafono Tau Faaofi o Teuteuga o le Tulafono o Aso Malolo mo Tagata  
Uma 2014 - iloiloga auiliili**

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Aso Malolo mo Tagata Uma  
2014.**

**FOFOGA FETALAI:** O lo o i ai le faasaoga a le Komiti i le Fuiaupu 1 ma le Igoa e pei ona faaalia i le Pepa Faaopoopo o Galuega.

**Afioga Hon LEAUPEPE TOLEAFOA APUPU FAAFISI:** Lau Afioga i le Fofoga Fatalai ou te faatu le Faasaoga i le Fuaiupu 1 ma le Igoa e faapea:

**“FAASAOGA:**

*Ia aveese le fuainumera “2014” ma sua i le fuainumera “2015” ma faitauina ai le Igoa o le Tulafono e faapea:*

**Teuteuga o le Tulafono o Aso Malolo mo Tagata Uma 2015.”**

*Faamaonia le Faasaoga*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o Teuteuga o le Tulafono o Aso  
Malolo mo Tagata Uma 2015 faatasi ma le Faasaoga.*

**TULAFONO TAU FAAOFI O FAATULAGAGA FAALETULAFONO  
O FUA O LE MAMAFMA FUA ESEESE O OLOA 2014  
– iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitafono o le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fatalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, ina ia faagasolo le Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2014 faatasi ma Faasaoga.*

**19 MATI 2015**

**Tulafono Tau Faaofi o Faatulagaga Faaletulafono o Fua o le Mamafa ma Fua Eseese o Oloa 2014 – iloiloga auiliili**

*Faaluaina e le sui usufono mo Siumu ma le Minisita mo Fesootaiga ma Faamatalaga Tekonolosi.*

**FOFOGA FETALAI:** O le a sagai atu loa le Fono Aoao i le Iloiloga Auiliili o le Tulafono Tau Faaofi o le Faatulagaga Faaletulafono o Fua o le Mamafa ma Fua Eseese o Oloa 2014.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

**FUAIUPU 2: Faamatalaina o uiga o upu.**

*Faamaonia.*

**FUAIUPU 3: Iunite faaletulafono e faaaogaina mo fefaatauaiga.**

*Faamaonia.*

**FUAIUPU 4: Iunite faatagaina.**

**Tofa LEALALEPULE RIMONI AIAFI:** Lau Afioga i le Fofoga Fetalaií

**FOFOGA FETALAI:** O le a le fuaiupu le sui usufono mamalu?

**Tofa LEALALEPULE RIMONI AIAFI:** O le Fuaiupu 4 faamolemole.

**FOFOGA FETALAI:** Iunite faatagaina. Tulai mai le sui usufono mamalu.

**Tofa LEALALEPULE RIMONI AIAFI:** O le faafesili ona o lea ou te manatua i le taimi na talanoaina ai lenei Tulafono Tau Faaofi, sa i ai le finagalo na tuu atu i le Komiti o Oloa Gaosia Tulaga Muamua, Mataupu tau Pisinisi ma Alamanuia, ina ia fesiliglia le Matagaluega o Aoga, po o le a sa latou faamatalaga ua tuuina mai e tusa ai o le fesuiaiga o fua nei, e tusa ai ma mea o lo o latou aoaoina i vasega ma mea sa tatou masani ai. O lea la e fesili ai i le Taitaifono pe na tapa le Matagaluega o Aoga e tusa ai ma lea fuafuaga.

Ma le faaaloalo lava.

**FOFOGA FETALAI:** Masalo ona pau lea o le fesili, tulai mai le Taitaifono.

**Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2014 – iloiloga auiliili**

**Afioga Hon MAGELE MAUILIU (Minisita mo Aoga, Taaloga ma Aganuu):** Lau Afioga i le Fofoga Fetalaií .

**FOFOGA FETALAI:** Malie lau Afioga i le Taitaifono se i avatu muamua le avanoa i le Minisita mo Aoga, Taaloga ma Aganuu.

**Afioga Hon MAGELE MAUILIU:** Lau Afioga i le Fofoga Fetalai, ona o lea ua taaa le Matagaluega o Aoga i lenei Tulafono Tau Faaofi, ona pau lava le mea e fai sina ou ofo i le puupuu o le memory o le sui usufono lea. E le i mamaao atu lava na talanoaina ai foi lenei mataupu i tototnu o le Maota ma sa faamalamalama o lo o aoaoina lava mea nei e lua. Faafetai.

**Tofa LEALALEPULE RIMONI AIAFI:** Lau Afioga i le Fofoga Fetalai, o le ala tonu lea o lou fesili aua o le finagalo lea o le Matagaluega e ao uma mea e lua ae le tusa ai la ma le Tulafono Tau Faaofi aua o lea ua pei ua faamamafa le suiga fou ua i ai nei. O le ala lea o lou fesili i le Taitaifono a o lou memory e oo i tua i le aso na ou fanau mai ai e le galo.

Ma lou faaaloalo lava.

**Afioga Hon LEAUMEPE TOLEAFOA APULU FAAFISI:** Lau Afioga i le Fofoga Fetalai, o lea ua saunoa le Afioga i le Minisita e ana tonu ma i ai taualumaga o le Matagaluega mo le aoaoina o alo ma fanau o le atunu. Ae puupuu lava le tali, o lea lava, sa fesiligia ma aumai ai la latou fautuaga, ae manaia le fesili e pei ona faaalia faafetai.

**FOFOGA FETALAI:** Tulai mai le Sui Palemia.

**Tofa Hon FONOTOE NUAFESILI PIERRE LAUOFO (Sui Palemia):** Lau Afioga i le Fofoga Fetalai, na o sina faaopoopoga laititi e tusa ai ma le fesili mulimuli a le sui usufono na tuuina mai. E leai lava se mea o i totonu o le Tulafono Tau Faaofi e taofia ai le aoaoina o fua uma nei e lua a o le tulaga i le faatinoga o lea ua aumai i le Tulafono Tau Faaofi.

*Faamaonia le Fuaiupu 4.*

**FUAIUPU 5: Faatulagaga.**

*Faamaonia.*

**Tulafono Tau Faaofi o Faatulagaga Faale tulafono o Fua o le Mamafa ma  
Fua Eseese o Oloa 2014 – iloiloga auiliili**

**FUAIUPU 6: Uluai faatulagaga.**

*Faamaonia.*

**FUAIUPU 7: Faatulagaga lona lua.**

*Faamaonia.*

**FUAIUPU 8: Faatulagaga tau galuega.**

*Faamaonia.*

**FUAIUPU 9: Faatulagaga le tumau.**

*Faamaonia.*

**FUAIUPU 10: Tagata e maitauina ma vaavaaia faatulagaga.**

*Faamaonia.*

**FUAIUPU 11: Noataga e faatauina atu ai oloa e ala i le mamafa a o le i  
tuuina i pusa po o fua eseese.**

**FUAIUPU 12: Noataga e fuaina ai le mamafa po o fua eseese.**

*Faamaonia.*

**19 MATI 2015**

**Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2014 – iloiloga auiliili**

**FUAIUPU 13: O le soligatulafono le tuuina atu o oloa e le o atoa le mamafa, le fua po o le aofai e tatau ona i ai.**

**Afioga TOEOLLESULUSULU CEDRIC POSE SALESA SCHUSTER**  
**(Aana Alofi Nu. 3):** Lau Afioga i le Fofoga Fatalaií ...

**FOFOGA FETALAI:** O le a le fuaiupu le sui usufono?

**Afioga TOEOLLESULUSULU CEDRIC POSE SALESA SCHUSTER:**  
O le fuaiupu 11 ma le Fuaiupu 13 faamolemole. O le faafesili i le Komiti aemaise o le Taitaifono pe afaei ae oo ina pasia lenei Tulafono Tau Faaofi, po o ua lava tapena le Matagaluega aemaise o le logoina o faleoloa i tua lea ua tele ina fua falaoamata tai 50sene i le pauna, po o ua lava tapena e nei faleoloa aemaise lava o faleoloa o lo o i nuu i tua o lo o tele ina toomaga i ai le atunu? Po o ua lava tapena i nei vaega ina ia mafai ona asia le faatinoina o lenei vaega o le Tulafono Tau Faaofi?

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fatalai, masalo e puupuu lava le tali e faamalulu atu i le Afioga i le Taitaifono. O lea e aumai i totonu o le Tulafono Tau Faaofi, faatoa amata faamamaluina le Tulafono Tau Faaofi i le aso e faasalalauna ai e le Minisita le aso tonu e amata ai ona faamamalu. O le mafuaaga o le moomia lea o le avanoa ina ia faasalalau ma faamalamalama atili ma toe logologo le tulaga o le au faatau oloa ma faleoloa mo le faatinoina o lenei Tulafono Tau Faaofi.

**FOFOGA FETALAI:** Ia se i toe tulai mai le sui usufono mamalu.

**Afioga TOEOLLESULUSULU CEDRIC POSE SALESA SCHUSTER:**  
Lau Afioga i le Fofoga Fatalai, faafetai i le saunoaga a le Sui Palemia, ae pei o le mea lea sa avatu ai le faafesili pe na fesiliglia e le Komiti faleoloa i tua. Po o le a sa latou tapenaga? O le mea moni e i ai le taimi e tapena ai ma faatino ae ia i ai foi tapenaga i faleoloa ina ia mafai ona suia uma a latou fua ma mea faapea. Po o le a se tali mai o i latou e i ai faleoloa aemaise o au fai oloa laiti o le a pau i ai le tele o lenei mea.

**FOFOGA FETALAI:** Tulai mai lau Afioga i le Taitaifono.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fatalai, o lea lava e tusa ai ma le fautuaga. Ua uma ona fesiliglia ma tapa fale laiti, faleoloa feoloolo ma faleoloa matutua. E avea foi lenei avanoa e faasilasila atu ai ma le agaga faaalolo, ua momoli mai alofaaga o le aufai oloa laiti ma le aufai oloa lapopoa i le tatou Palemene. Faafetai.

*Faamaonia le Fuaiupu 11.*

**19 MATI 2015**

**Tulafono Tau Faaofi o Faatulagaga Faaletulafono o Fua o le Mamafa ma  
Fua Eseese o Oloa 2014 – iloiloga auiliili**

*Faamaonia le Fuaiupu 13.*

**FUAIUPU 14: Oloa afifi.**

**Tofa LEVAOPOLO TALATONU (Gagaemauga Nu. 2):** Lau Afioga i le Fofoga Fetalai, o le Fuaiupu 14 faamolemole.

**FOFOGA FETALAI:** Oi ia tulai mai le sui usufono mamalu.

**Afioga LEVAOPOLO TALATONU:** Leai ou te fia fesili atu lava i le Afioga i le Taitaifono ma le Komiti i le tulaga o oloa ua uma ona afifi ma tuu i totonu ó lea ua tuu i ai ma le latou tag lea na ona aumai lava tuu i ai le mea oso mai le prize ae le o mautinoa le mamafa o pauna moa ma mea faapena. Po o i ai se vaega o le latou saililiga ina ia foia ai le faafitalui?

Ma le agaga faaaloalo.

**FOFOGA FETALAI:** Lau Afioga i le Taitaifono.

**Afioga Hon LEAUPEPE TOLEAFOA APULU FAAFISI:** Ma le faaaloalo lava ua maea tapena o lena foi e i ai le Tulafono o le Fair Trading, ae silasila atu foi le tagata faatau (consumer) e le atoa pauna i lana silasila e mafai lava ona saili se isi faamaoniga, a o lo o taumafai ina ia silasila atu le tagata faatau e sao le fua lae tuu i ai le vaemoa po o le a lava le faatau e tuu i luga o le fua ma faatauina loa lava i lena taimi. Ma le faaaloalo lava.

**Afioga LEVAOPOLO TALATONU:** Lau Afioga i le Fofoga Fetalai, faamolemole o le ala tonu lea o lau fesili. Ona o lea ou te vaavaai atu i le Lipoti lenei e le i oo i ai se asiasiga a le Komiti, o lona uiga e le i atoatoa lelei le latou galuega i le mea lea e avatu ai le fesili.

**FOFOGA FETALAI:** Tulai mai le Sui Palemia.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, ou te fia fesoasoani atu i le mataupu lea, ona o le fesili e agai tonu lava i se tasi o tiute a le Matagaluega. O le mea lea, o le faatino o tiute a le Matagaluega, e alu le latou asiasiga e ave foi a latou fua e o atu e siaki ai le mamafa o oloa ia ua uma ona tuu i totonu, ae ese foi taimi e alu ai mea o asiasiga e siaki ai fua la e faaaoga mo faleoloa po o lelei, po o sao. Lona uiga e fai le mea lea, e calibrate mea o fua, e i ai la taimi e faagasolo ai le siakiina o le calibrate ina o fua na e faaaoga i faleoloa ia aua ne i sese, ia sao i taimi uma.

**19 MATI 2015**

**Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2014 – iloiloga auiliili**

**FOFOGA FETALAI:** Malie Levaopolo ua uma ou avanoa e lua, o lea o le a avatu ia Aveautau. Tulai mai Aveautau.

**Tofa AVEAU TUALA LEPALE NIKO PALAMO (Faleata Sasae):** Lau Afioga i le Fofoga Fatalai, ona o au o le sui usufono o le Komiti a o lea ua fesiliglia le Komiti lenei, o le mea e fia faamalamalama i le sui usufono, masalo a faitau maeaea i le Tulafono o lo o i ai uma i totonu o le Tulafono tali o fesili a le vaega lea. Masalo o lea e piki mai na o mea taitasi i totonu. I lalo o le Tulafono lenei o lo o sau ai foi ma le labelling, e le mafai ona toe faatinoina e se faleoloa le mea lea ua e alu atu nei o taatia le pepa aniani ae leai se fua. Ua tatau oa taatia tuu ai lava a faapea e lua kilo, tuu ai lava ma le lua kilo ma le tau, a leai, e te alu atu lava oe e fua. O lalo o le Tulafono lena o lo o i ai le vaega lena i i. E le toe faatagaina le vaega lena, e tatau lava ona fua. Afai foi ua faatulai le fua e tatau ona iloa atu e le tagata faatau le fua lea e fua ai, po o sao pauna ia e te manao e faatau. Ma le faaaloalo lava.

**Tofa LEVAOPOLO TALATONU:** Lau Afioga, o lea la faatoa ou malamalamama ina ua tulai le sui usufono o le Tautua e faamalamalama, a ua alu le taeao o ou fesili ou te le malamalamama, ua atili ai ona ou le malamalamama i le tulai mai o le Sui Palemia.

**Tofa Hon FONOTOE NUAFESILI PIERRE LAUOFO:** Lau Afioga i le FoFoga Fatalai, a faafogaga lelei lava le sui usufono i le faamalamalamaga lea na aumai e le sui usufono o le latou Itu, o le sui usufono o le Komiti, e leai ma se eseese ma le mea lea na ou avatua ma saunoa i ai le Taitaifono o le Komiti.

*Faamaonia le Fuaiupu 14.*

**FUAIUPU 15: Noataga e faailoga ai afifi.**

**FUAIUPU 16: Noataga e faatauina atu ai oloa ua afifi e ala i le mamafa po o fua eseese.**

**Afioga TOEOLESULUSULU CEDRIC POSE SALESA SCHUSTER:** Lau Afioga i le Fofoga Fatalai, faamolemole o le Fuaiupu 15 ma le Fuaiupu 16.

**FOFOGA FETALAI:** Saunoa le sui usufono.

**19 MATI 2015**

**Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2014 – iloiloga auiliili**

**Afioga TOEOLLESULUSULU CEDRIC POSE SALESA SCHUSTER:** O le fesili faamolemole lau Afioga i le Fofoga Fetalai, ona ... taatia la vaega ia e fua e faleoloa a o nisi o tatou exports ma imports ia e taunu mai. Pe na o le fuaina i totonu i le taimi e taunu mai ai e iloa ai pe toe siaki foi i tua i faleoloa ia i le taimi e faatau ai e oloa weight pe mafai ona toe fesiligia e tagata taitoatasi pe a alu atu. O se faataitaiga o se pepa chips o lea e tusi mai e afa kilo le mamafa, ae mafai foi ona toe fesiligia e tagata e toe fua pe sao lea weight pe toe siaki e le labour po o latou o lo o feagai ma lea suesuega. Faafetai.

**FOFOGA FETALAI:** Tulai mai lau Afioga i le Taitaifono.

**Afioga Hon LEAUEPEPE TOLEAFOA APULU FAAFISI:** Ma lou faaaloalo lava, e le noatia lea tulaga o le toe siaki e le tagata faatau . E le o noatia e le Tulafono le toe... Na pau o le mea o lena e aumai e le Tulafono ia maua le avanoa e paleni ai, e le gata ... aua o lenei Tulafono, e ala ona faatino, ona ... ia ogatusa ma tatou fefaatauaiga mai fafo, international i le tulaga o lo o i ai le tatou feagaiga foi lenei o fefaatauaiga. O lona uiga ia paleni tatou, ia pei o faiga la e fai mai fafo. Ma lou faaaloalo lava.

*Faamaonia le Fuaiupu 15.*

*Faamaonia le Fuaiupu 16.*

**FUAIUPU 17: O soligatulafono mo tautinoga po o faamatalaga sese pe le sao.**

**Afioga TOEOLLESULUSULU CEDRIC POSE SALESA SCHUSTER:** Lau Afioga i le Fofoga Fetalai....

**FOFOGA FETALAI:** O le a le numera?

**Afioga TOEOLLESULUSULU CEDRIC POSE SALESA SCHUSTER:** O le Fuaiupu 17 ona o lo o tusi mai ai o le person, o le tagata ae le o se kamupani lea e ono faatauina vaega sese. E le mafai la ona moliaina se kamupani latou te aumaia pe faatauina, ae molia na o le tagata po o se faleoloa foi, e le mafai ona moliaina le faleoloa ae sue se tagata e moliaina. Faamolemole lava, mo le faamalamalamaina o lea vaega.

**FOFOGA FETALAI:** Ia, lau Afioga i le Taitaifono.

**19 MATI 2015**

**Tulafono Tau Faaofi o Faatulagaga Faalekulafono o Fua o le Mamafa ma Fua Eseese o Oloa 2014 – iloiloga auiliili**

**Afioga Hon LEAUPEPE TOLEAFOA APULU FAAFISI:** Lau Afioga ou te le o maua lelei le saunoaga a le sui usufono leaga e fai sina leo laititii o le siufofoga o le sui usufono ae manumanu leaga e uma ai lona lua ua faalua ona tulai mai, ae lelei ona toe saunoa mai ona manaia lea. Ae manumanu e uma ai le faalua ona tulai mai, ae lelei ona toe faaleotele mai, aua a toe tulai mai, ua count le lua avanoa, ua uma ai foi i i.

**Tofa AVEAU TUALA LEPALE NIKO PALAMO:** Lau Afioga i le Fofoga Fetalai, mo le faamalamalamaina o le vaega lea, o le kamupani lava o le person a lena. Tusa e refer le kamupani agai le person. Ma le faaaloalo lava.

**FOFOGA FETALAI:** Ia o lena ua tali atu le sui usufono o le Komiti.

**Afioga TOEOLESULUSULU CEDRIC POSE SALES A SCHUSTER:** Faamolemole lau Afioga leaga e le o faasaua i luga o tatou definitions le person or company, separate. Atonu foi e oo i ai latou o i ai tomai i vaega faa-loia a avatu i le Tulafono atonu e tele le eseesege o le kamupani ma le tagata e toatas. E taua la lea vaega, ona e le mafai ona molia se kamupani. I lau lea faiata i ai, atonu e ao la ona toe silasila i ai, afai e pasia le Tulafono, o le fautuaga ina ia toe iloilo ma toe faasao mai mo se taimi o i luma lau Afioga.

**FOFOGA FETALAI:** Fafetai mo le fautuaga. E manatu o lea ua tusia i lalo e le Afioga i le Taitaifono.

*Faamaonia le Fuaiupu 17.*

**FUAIUPU 18: E mafai e le Faamasinoga ona poloia le tagata solitulafono ina ia toe faaatoatoa so o se tulaga faaletonu.**

**Tofa LEVAOPOLO TALATONU:** Lau Afioga i le Fofoga Fetalai, o lea la ua toe manino mai le mataupu lea i le Fuaiupu 18. O lea ua sau sao lava e mafai e le Faamasinoga ona molia se tagata solitulafono. O lea foi ua toe tuu sao lava i le tagata ae tuu le kamupani. Ma le faaaloalo lava.

**FOFOGA FETALAI:** Ia, nei manatu le sui usufono mamalu o le tagata lava e ona le kamupani, nei tei ua tatou tulituliloa lea itu ae manatu e leai se isi e mafai ona... Se i tulai mai lau Afioga i le Minisita mo Fesootaiga ma Faamatalaga Tekonolosi.

**19 MATI 2015**

**Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2014 – iloiloga auiliili**

**Afioga Hon TUISUGALETAUA SOFARA AVEAU (Minisita mo Fesootaiga ma Faamatalaga Tekonolosi):** Ua ou tulai atu ma le ava ma le faaaloalo i lau Afioga, o fesili ia sa sau nei e sao lelei lava le Afioga i le Sui Palemia, e iloa ai e le i fataua le Tulafono Tau Faaofi. O lea la ua uma ona sau le 17 a o lea e oso mai le isi fai mai, o lea faatoa sau le 18. Lona uiga la, e lei fatauina le Tulafono Tau Faaofi. Ona soona sau ai fua lea o mea e toso ai le tatou taimi, a o mea... e le mafai ona alu se isi fesili i se kamupani, e leai, e fesili i le tagata e ona le kamupani. O le make sense le igoa o le mea lena.

**FOFOGA FETALAI:** Ia, e manatu ua manino ma malamalama finagalo o sui usufono.

*Faamaonia le Fuaiupu 18.*

**FUAIUPU 19: Manaoga mo meafaigaluega.**

*Faamaonia.*

**FUAIUPU 20: Faailogaina.**

*Faamaonia.*

**FUAIUPU 21: Faatulagaga o meafaigaluega ma fua eseese faamauina.**

*Faamaonia.*

**FUAIUPU 22: Faamaonia o le tulaga moni ma le sao.**

*Faamaonia.*

**FUAIUPU 23: Teena o le tuuina atu o meafaigaluega.**

*Faamaonia.*

**Tulafono Tau Faaofi o Faatulagaga Faalekulafono o Fua o le Mamafa ma  
Fua Eseese o Oloa 2014 – iloiloga auiliili**

**FUAIUPU 24: O le tusia faagaoi o se pepa po o se igoa o se tasi tagata.**

*Faamaonia.*

**FUAIUPU 25: Gaosia pepelo o mea e faafoliga i mea moni.**

*Faamaonia.*

**FUAIUPU 26: O le uiga o le upu “o se tagata”.**

*Faamaonia.*

**FUAIUPU 27: Laisene e gaosia ai, faatau atu po o e toe faalelia ai  
meafaigaluega.**

*Faamaonia.*

**FUAIUPU 28: Soligatulafono mo le faatauina atu o meafaigaluega e le i  
faamaonia.**

*Faamaonia.*

**FUAIUPU 29: Matafaioi ma galuega tauave a le Matagaluega.**

*Faamaonia.*

**FUAIUPU 30: Malosiaga o le Ofisa Sili o Pulega.**

*Faamaonia.*

**19 MATI 2015**

**Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2014 – iloiloga auiliili**

**FUAIUPU 31:** Tofaina ma le faamutaina o tofiga o tagata asiasi.

*Faamaonia.*

**FUAIUPU 32:** Tiute tauave o tagata asiasi.

*Faamaonia.*

**FUAIUPU 33:** Pule faataga e fetuunai ai, suia pe toe faaleleia.

*Faamaonia.*

**FUAIUPU 34:** Filifilia o lala sooupou e faia suesuega.

**Tofa LEALALEPULE RIMONI AIAFI:** Lau Afioga i le Fofoga Fetalai.....

**FOFOGA FETALAI:** O le a le fuaiupu?

**Tofa LEALALEPULE RIMONI AIAFI:** Ou te fia fesili i le Fuaiupu 34 faamolemole lau Afioga.

**FOFOGA FETALAI:** Saunoa le sui usufono.

**Tofa LEALALEPULE RIMONI AIAFI:** Lau Afioga i le Taitaifono, ona o le malosiaga lea ua tuuina atu i lalo o le vaega lea o le Tulafono i le Pule Sili na te tofaina ai ni agents, lala e faatino le galuega lea, aua o lea e i ai ma totogi, fees. O le fesili lau Afioga, sa faapea, o le a le mea o le a toe tofia ai ni tagata ese mai i tagata o le Matagaluega e faatino le galuega lea, ina ia aveese ai ni tau faaopoopo e faaopoopo atu i nai tagata faipisinisi ae le faatino e le Matagaluega le galuega lea. Ma le faaalaoalo lava.

**FOFOGA FETALAI:** Tulai mai lau Afioga i le Taitaifono o le Komiti.

**Afioga Hon LEAUPEPE TOLEAFOA APULU FAAFISI:** Faafetai mo le faafesili a le sui usufono mamalu. Ia manatua foi e mafai ona le lava tagata faigaluega mai lea taimi i lea taimi. E mafai la ona oo i se tulaga, a o la e tatala le avanoa i le pule faataga a le Minisita e filifilia ma tofia ai i tulaga e pei ona i ai. O le tali puupuu atu lea.

**Tulafono Tau Faaofi o Faatulagaga Faaletulafono o Fua o le Mamafa ma  
Fua Eseese o Oloa 2014 – iloiloga auiliili**

*Faamaonia le Fuaiupu 34.*

**FUAIUPU 35: Soligatulafono mo tagata asiasi.**

*Faamaonia.*

**FUAIUPU 36: Faasalaga lautele ma poloaiga e faoa faamalosi ai.**

*Faamaonia.*

**FUAIUPU 37: E noatia se tagata ofisa autu mo soligatulafono a tagata  
faigaluega ma sui souopu.**

*Faamaonia.*

**FUAIUPU 38: Faamatalaga molimau.**

*Faamaonia.*

**FUAIUPU 39: Puipuiga.**

*Faamaonia.*

**FUAIUPU 40: Foia o feeseseaiga.**

*Faamaonia.*

**FUAIUPU 41: Totogifuapauina ma pepa faatumu.**

*Faamaonia.*

**Tulafono Tau Faaofi o Faatulagaga Faalelafono o Fua o le Mamafa ma Fua Eseese o Oloa 2014 – iloiloga auiliili**

**FUAIUPU 42: Tulafono Faatonutonu ma teuteuga o Faamatalaga.**

*Faamaonia.*

**FUAIUPU 43: Soloia, aiaiga faasaoina ma aiaiga tau soloaiga.**

*Faamaonia.*

#### **FAAMATALAGA:**

**FOFOGA FETALAI:** O lo o i ai le Faasaoga mo na o le Gagana Samoa i le Faamatalaga e pei ona faaalia i le Pepa Faaopoopo o Galuega.

Tulai mai lau Afioga i le Taitaifono o le Komiti.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te faatu le Faasaoga i le Faamatalaga e faapea:

#### **“FAASAOGA:**

*Ina ia soloia upu ua taura i lalo mai le Faamatalaga 1&2 ma suia i upu ua taura i lalo:*

Gagana Peretania	Faaliliuga i le taimi nei	Faasaoga ma le faaliliuga
joule	toule	Touli
bushel	pusele	Posele
deciliter	tekilita	Tesilita
hectoliter	ekolita	Hetalita
decitex	kesitesi	Tesiteki
cubicinches	Kupita inisi	Inisi kupitaö

Ma le faaaloalo.

**FOFOGA FETALAI:** Malie lau Afioga i le Taitaifono se i tulai mai le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, e le o manino i le faalogo atu. Se i toe amata mai lava.

**19 MATI 2015**

**Tulafono Tau Faaofi o Faatulagaga Faaletulafono o Fua o le Mamafa ma Fua Eseese o Oloa 2014 – iloiloga auiliili**

**FOFOGA FETALAI:** Malie lau Afioga i le Taitaifono mo le faasaoina o lou taimi, se i tulai mai le Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga, ua ou faanoanoa i lenei taeao, po o fea na o le Komiti aumai ai nei upu Samoa ua matua le tusa ai ma le Gagana Samoa lau Afioga i le Taitaifono. O lea ou te vaai atu e pei ua e... e pei o isi upu ia pei ni upu foi ia... ioe, upu palauvale isi upu la e lau mai o. Po o fea na aumai ai nei... A o lea o le a pasia faaletulafono nei upu. O le mea lea o lea ou te tulai atu ai ma lou faaloalo.

**FOFOGA FETALAI:** Se i tulai mai lau Afioga i le Taitaifono.

**Afioga Hon LEAUMEPE TOLEAFOA APULU FAAFISI:** Lau Afioga i le Fofoga Fetalai, ne i tuuaiina le Komiti, ae le o silafia ma malamlama le Afioga i le Taitai o le Itu e Agaia le Malo i le tatou mataupu lea e fai ma lou tau tulai atu e faamalamalama. O lea e suia mai e le Komiti mai upu ia ina ia sui ai le gagana ina ia aloese mai le gagana lea e faitioina e le Taitai o le Itu Agai. A o le faaliliuina lea sa aumai e le Matagaluega, o le a ou le taua foi le Matagaluega. Ae o lea la na taumafai le Komiti e liliu i le gagana faigofie ina ia aloaloese mai le mea la lea e saunoa i ai le Taitai o le Itu Agai. Ia, ma lou faaaloalo.

**FOFOGA FETALAI:** O lea sa talosaga atu le Palemia e toe lau mai le faasologa, ae aua le lauina le faaaliga muamua, ae lau mai na o le faaaliga mulimuli lau Afioga i le Taitaifono. E amata mai i le touli.

**Afioga Hon LEAUMEPE TOLEAFOA APULU FAAFISI:** Ma lou faaaloalo, masalo o le a ou pasi atua i le Palemia i se taimi i le tulaga o lo o i ai. Faafetai mo le avanoa.

*Faamaonia le Faamatalaga e pei ona Faasaoina.*

**FUAIUPU 1 MA LE IGOA:**

**FUAIUPU 1:** **Igoa puupuu ma le amataga.**

**IGOA:** **Tulafono o Faatulagaga Faaletulafono o Fua o le Mamafa ma Fua Eseese o Oloa 2014.**

**FOFOGA FETALAI:** O lo o i ai le Faasaoga a le Komiti i le Fuaiupu 1 ma le Igoa e pei ona faaalia i le Pepa Faaopoopo o Galuega.

Tulai mai lau Afioga i le Taitaifono o le Komiti.

**19 MATI 2015**

**Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2014 – iloiloga auiliili**

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te tulai atu e faatu le Faasaoga i le Fuaiupu 1 ma le Igoa e faapea:

**“FAASAOGA:**

*Ina ia aveese le fuainumera 2014 ma suia i le fuainumera 2015 ina ia faitauina ai e faapea:*

**“TULAFONO TAU FAAOFI O LE FAALAPOTOPOTOGA FAAVAE E UUNAIA LE SOIFUA MALOLOINA LAUTELE 2015.”**

Ma lou faaaloalo.

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2015 faatasi ma Faasaoga.*

**TULAFONO TAU FAAOFI O LE FAALAPOTOPOTOGA FAAVAE E UUNAIA LE SOIFUA MALOLOINA LAUTELE 2013  
– iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloitoga Auiliili o le Tulafono Tau Faaofi.

Tulai mai lau Afioga i le Taitaifono

**Afioga Hon GATOLOAIFAANA AMATAGA ALESANA GIDLOW (Taitaifono, Komiti o le Soifua Maloloina, Galuega tau le Va Fealoai, Mataupu tau Lotoifale, Atinae o Afioaga ma Agafesootai):** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2013 faatasi ma Faasaoga.*

**19 MATI 2015**

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

*Faaluaina e se tasi o sui usufono mo le Palota Taitoatasi, Susuga Hon Papaliitele Niko Lee Hang, ma le sui usufono mo Aleipata Itupa i Lalo.*

**FOFOGA FETALAI:** E faasilasila atu ua faamaonia nei e le Fono Aoao le Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale, Atinae o Afioaga ma Agafesootai i le Tulafono Tau Faaofi o le Faalapotopotoga Faavae e Unaia le Soifua Maloloina Lautele 2013.

O le a sagai atu le Fono Aoao i le Iloiloga Auiliili o le Tulafono Tau Faaofi o le Faalapotopotoga Faavae e Unaia le Soifua Maloloina Lautele 2013.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

**FUAIUPU 2: Faamatalaina o uiga o upu.**

*Faamaonia.*

**FUAIUPU 3: Faavaeina o le Faalapotopotoga Faavae.**

*Faamaonia.*

**FUAIUPU 4: O sini o le Faalapotopotoga Faavae.**

**Tofa LEALALEPULE RIMONI AIAFI (Faleata Sisifo):** Lau Afioga i le Fofoga Fetalaií í

**FOFOGA FETALAI:** O le a le Fuaiupu le sui usufono mo Faleata Sisifo?

**Tofa LEALALEPULE RIMONI AIAFI:** O le Fuaiupu 4 lau Afioga.

**FOFOGA FETALAI:** Saunoa le sui usufono.

**Tofa LEALALEPULE RIMONI AIAFI:** I le mafuaaga ua faatu ai leí í Ou te fia fesili lau Afioga i le Taitaifono, e matau atu i le latou Lipoti i le tele foi o tagata na o atu ma faaali o latou finagalo. A o lea la ou te faitau atu i le aotelega o finagalo, pei o le tele o finagalo lea e summarise mai e le tuuaofaiga lea na aumai nei e le Komiti, e pei e toatele i latou na tetee i le faatuina o lenei fono ma latou fautua mai ai i nisi auala e talafeagai ma taugofie.

**19 MATI 2015**

**Tulafono Tau Faaofi o le Faalapotopotoga Faavae e Uunaia le Soifua  
Maloloina Lautele 2013 – iloiloga auiliili**

Ou te fesili i le Afioga i le Taitaifono, pe mafai ona maua sina faapupulaga laitiiti o le vaega lea ona e le o manino mai i le Lipoti. Ma le faaaloalo lava.

**FOFOGA FETALAI:** Tulai mai lau Afioga i le Taitaifono. Malie se i faasao lou taimi, tulai mai le sui usufono mo Aana Alofi Nu. 3.

**Afioga TOEOLLESULUSULU CEDRIC POSE SALESA SCHUSTER:** Faafetai lava lau Afioga i le Fofoga Fetalai mo le avanoa. O le Fuaiupu 4 lava lea e avatu ai foi se faafesili, ona o le taimi foi na faatalanoaina ai i totonu o le Maota e i ai nisi lagona na faaalia. O le faafesili la lau Afioga i le Fofoga Fetalai, i suesuega a le Komiti pe na maua mai se ata faataitai o le tau o le faagaoioiga o lenei Pulega fou pe a oo ona faavae ma ni ala seleni e mafai ona faatino ai ona o le tele o vaega seleni lea e vaai atu e faapea ona tuuina atu e le Malo, ae pe fia se tau mo se aofai o i latou faigaluega o le a manaomia? Faafetai.

**FOFOGA FETALAI:** Tulai mai lau Afioga i le Taitaifono.

**Afioga Hon GATOLOAIFAANA AMATAGA ALESANA GIDLOW:** Faafetai i lau Afioga i le Fofoga Fetalai, faafetai foi mo faafesili a sui usufono mamalu.

O le tulaga muamua i finagalo faaalia o i latou taitasi na o atu foi e faaali o latou finagalo, e moni, e i ai e na teena, ae toatele foi o latou na lagolagoina le Tulafono. O le iloiloga la a le Komiti sa faafeagai ai, e fai le fua faatatau o e na tetee ma o latou finagalo i e na latou faaalia le agaga lagolago ona o mea lelei o le Tulafono na mafua ai ona faatino le Tulafono ma faatulai mai le Tulafono. Ia ona faapena lava lea ona aumai ai o se aotelega i luma ia silafia ma tagai i ai le tatou Palemene nei, ae ua outou tagai foi i le umi o taimi o faagasolo ia iloiloga ma auiliiliga o le Tulafono, e le i faigofie le galuega a le Komiti ina ia mafai ona tagai i vaega eseese ma itu eseese, e pei ona faaalia ai finagalo o le mamalu na afifio atu foi i ia foi iloiloga.

Ae tusa ai ma le faafesili i se fua faataitai po o se tau faataitai o le faatuina o lenei foi Faalapotopotoga, ua matou vaavaai agai i le tulaga o le taugata o le togafitiga o gasegase o lo o faafeagai nei ma le tatou Malo agai i le faatulaiina ma le fausia o se Faalapotopotoga e uunaia le taofiofiga o togafitiga o ia gasegase, e tele ma sili atu le tele o le seleni o lo o faafeagai nei ma faaalu a le tatou Malo, i seleni e alu i le faatupega o se Faalapotopotoga e latou te galulue ina ia taofiofi ia faamai ogoga o lo o afaina ai ma taugata ai le togafitiga o le soifuaga ia ma alu ai le tamaoaiga a lo tatou Malo.

O le tali atu lena lau Afioga i le Fofoga Fetalai.

**Afioga TOEOLLESULUSULU CEDRIC POSE SALESA SCHUSTER:**  
Lau Afioga i le Fofoga Fetalai ..

**19 MATI 2015**

**Tulafono Tau Faaofi o le Faalapotopotoga Faavae e Uunaia le Soifua  
Maloloina Lautele 2013 – iloiloga auiliili**

**FOFOGA FETALAI:** Ia o le avanoa faalua o le sui usufono.

**Afioga TOEOLLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai mo le avanoa. Leai o le vaega lea na faafesili ai ona o le isi foi vaega lau Afioga i le Fofoga Fetalai, ia po o i le faatalanoaina e le Komiti i nisi o Matagaluega ma itutino o lo o faapea ona faatinoina galuega faa-Soifua Maloloina, po o le a latou le toe faatinoina la vaega o le a faatino e lenei Faalapotopotoga ona e talitonu, o le tele foi o lo o faatinoina e le gata o le Health Services ia o le Kidney Foundation ma nisi o vaega, o lo o faapea foi ona latou faia health promotion. Po o o le a la se tuutuuga e tusa ai foi ma nei vaega pe o le a tuu uma i le Health Foundation pe fai pea a latou health promotion? O le atugaluga lau Afioga ina iaí ..o le a oo ina duplicate ma tele ai a tatou resources e alu, ia ae o lo o taumafai e faaititia seleni e alu, faafetai.

**FOFOGA FETALAI:** Ia lau Afioga i le Taitaifono.

**Afioga Hon GATOLOAIFAANA AMATAGA ALESANA GIDLLOW:** Ia faafetai lava mo le faafesili. O le tulaga lena o lo o i ai. O e o lo o i ai nei i totonu o le Matagaluega, o lo o faafeagai ma le health promotion po o le uunaia, o le a o i latou e latou te fesoasoani i le faatinoina o le Faalapotopotoga fou lea. A o isi foi pei la o le faataitaiga o le Falemai Faamama Toto, o le a latou concentrate lava pe focus latou ia promotion i luga o tagata o aafia o latou totoga ma taulalata atu i luga o togafitiga o alatoto, ae o le a concentrate o galuega uma tau health promotion, o le a i lalo o le Faalapotopotoga lea.

**FOFOGA FETALAI:** Malo faafetai. Ia lau Afioga i le Taitaifono.

**Afioga Hon TUITAMA TALALELEI TUITAMA (Minisita mo le Soifua Maloloina):** Lau Afioga i le Fofoga Fetalai í

**FOFOGA FETALAI:** Ia se i tulai mai lau Afioga i le Minisita mo le Soifua Maloloina.

**Afioga Hon TUITAMA TALALELEI TUITAMA:** E fia fesoasoani atu i le vaega lea ona e taua, ua tele foi ni manatu ua lagalaga i le talanoaina o lenei Tulafono e mafua mai lava i le agaga lea pei ona faasilasila i le aso. Silasila lau Afioga i le Tulafono, o le parakalafa muamua lava o le Tulafono i le otootoga, o lena o lo o aumai manino ai le tulaga lea, talu mai le vaevaega lea o le Matagaluega i le 2006 ma le 2007, lea na aveese ai loa le auaunaga, aveese le vaega lea o le Pulega ina ia agai tonu latou i le vaavaaiga o le monitoring ma tulaga faa-supervision ma mea faapena.

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

Ae talu ai la ona e le i i ai se health foundation i lea taimi promotion, o lea la na ave faatasi ai ma le galuega lea o le puipuiga lautele ma le uunaiina o le soifua maloloina, o lea la o lo o tauave nei lava e le Ministry of Health.

A o le tulaga la lea a alu ese mai loa le foundation lea, ona agai tonu lea o latou ia i galuega faapuipuiga o le soifua maloloina, ae sagai tonu le Ministry of Health latou i le latou matafaioi. O le tulaga foi ia i latou o le a faafaigaluega, o tagata lava ia o lea o lo o faatinoina galuega i le taimi lenei i totonu o le Ministry of Health, lea o le a o ese mai i i i le foundation, latou te tauaveina i lalo o le foundation. Ia ma o le tala atu, e leai ni aufaigaluega faaopoopo tele o le a i ai, o tagata lava ia o lo o faatinoina i le taimi nei o la e fai. Pau lava o lea, o lea o le a mavaevae ai functions, ma sagai tonu loa le Ministry latou ia i a latou galuega masani, o le faatinoga o le latou galuega lea o le monitoring ia ma le quality of screens o le Matagaluega, ae sagai le vaega lea mo le puipuiga o le soifua maloloina, ia ma agai tonu le latou faagaoioiga i mea ia o prevention and health education and health promotion.

Lau Afioga o sina faamalamalamaga lea, faafetai.

**FOFOGA FETALAI:** Malo faafetai. E manatu o lea ua maua le faamalamalamaga a lau Afioga i le Minisita.

*Faamaonia le Fuaiupu 4.*

**FUAIUPU 5: O galuega tauave a le Faalapotopotoga Faavae.**

*Faamaonia.*

**FUAIUPU 6: O malosiaga o le Faalapotopotoga Faavae.**

*Faamaonia.*

**FUAIUPU 7: Komiti Faatino o Faatonu.**

*Faamaonia.*

**FUAIUPU 8: Vaitaimi e umia ai le tofi.**

*Faamaonia.*

*19 MATI 2015*

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

**FUAIUPU 9: Totogi ma alauni.**

*Faamaonia.*

**FUAIUPU 10: Aveesea mai le tofi.**

*Faamaonia.*

**FUAIUPU 11: Faamavae mai le tofi.**

*Faamaonia.*

**FUAIUPU 12: Avanoa o le tofi.**

*Faamaonia.*

**FUAIUPU 13: Faailoaina atu o aia, ma isi tulaga faapena.**

*Faamaonia.*

**FUAIUPU 14: Aloaia o gaoioiga ma faaiuga.**

*Faamaonia.*

**FUAIUPU 15: O fonotaga a le Komiti Faatino.**

*Faamaonia.*

**FUAIUPU 16: Komiti faufautua.**

**Tofa LEALALEPULE RIMONI AIAFI:** Lau Afioga i le Taitaifonoí í

**19 MATI 2015**

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

**FOFOGA FETALAI:** O le a le Fuaiupu?

**Tofa LEALALEPULE RIMONI AIAFI:** O le Fuaiupu 16 faamolemole.

**FOFOGA FETALAI:** Saunoa le sui usufono.

**Tofa LEALALEPULE RIMONI AIAFI:** E fesili atu i le Taitaifono o le Komiti, pe na tagai, o le a le moomia ua toe faatu ai foi le Komiti Faufautua o lea ua i ai le Komiti Faafoe? O tagata o lo o i totonu o le Komiti Faafoe, pei ona fai mai le Tulafono, e tatau ona i ai ni tagata agavaa se toatolu ua lava le tomai, a o la e faapea, e toe fai foi ma le Komiti Faufautua. O le fesili la lea lau Afioga, e toe totogi foi tagata ia aua o lea faapea mai, e toe maua foi a latou alauni. Po o le a le mafuaaga e toe moomia ai se Komiti Faufautua o lea ua i ai le Komiti Faafoe o i latou ua lava le agavaa e faatinoa le galuega? Ma le faaaloalo lava.

**FOFOGA FETALAI:** Lau Afioga i le Taitaifono.

**Afioga Hon GATOLOAIFAANA AMATAGA ALESANA GIDLOW:** Faafetai i lau Afioga i le Fofoga Fetalai, lau Afioga o le tulaga foi lea e i ai lava taimi e manaomia ai ni tagata e poto faapitoa e ono faatinoa se galuega ina ia atoatoa ona lelei, o le Komiti Faufautua la na mai lea taimi i lea taimi e manaomia e le tatou Board po o le tatou Komiti Faatonu, ina ia faatinoa atoatoa se galuega o lo o tulai mai i lea taimi i lea taimi. O le tali atu lena.

**Tofa LEALALEPULE RIMONI AIAFI:** Lau Afioga i le Fofoga Fetalai, e manatua foi e i ai le malosiaga i lalo o le Komiti Faatonu, e valaaulia ai latou e i ai le poto faapitoa pe a moomia mai lea taimi i lea taimi i taimi e fono ai le Komiti Faatonu, a o le mea lea e i ai tusa o lea ua toe fai lava se isi Komiti Faufautua e ese mai lava i le Komiti Faatonu. O le ala lea o le fesili lau Afioga, pe aisea o le a fai ai se isi Komiti Faufautua e ese mai ma le Komiti Faatonu a o lea e i ai le malosiaga o le Komiti Faatonu, e valaaulia ai tagata faapea i le taimi e moomia ai pe a moomia. Ma le faaaloalo lava.

**FOFOGA FETALAI:** Malo. Le sui usufono mo Falealupo, tulai mai le Sui Taitai o le Itu Agai.

**Afioga Hon AEAU PENIAMINA LEAVISEETA (Falealupo):** Lau Afioga i le Fofoga Fetalai, ona o au o se tasi o le Komiti, e tatau pea ona faamalamalama. I le tulaga lea i le vaega o le foundations leaga o lea ua aliali mai le tulaga lea pei ona saunoa le sui usufono i le Komiti Faafoe, Komiti Faufautua, o le agaga moni lava e le natia i le mea lea o le foundations, leaga e toatele fomai sa against i le mea lea, e le natia lena tulaga ona o lona mafuaaga, pei e foliga o le a duplicate le galuega, o le vaega i i i le foundation ma le vaega tonu lava lea e faia le promotion.

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

E i ai la le manatu o latou faapea, o le foundation, pei o se vaega e matua faamautu lelei o sailiga tipe, aua e tatau po o se non communicable diseases e manaomia e matua fai lelei lava se vaega o le latou lea galuega, o le foundation o le sailiga ma talia tipe, aua e tatau, o le mea e tatau o le i ai lea o le foundation. A o le vaega lea e faatinoa, o le vaega la lea e le o tau le fafia agai i le foundation. Ona o le agaga lava ia o le foundation i le matau atu, o le faamaoopooina o aisiga tipe, o le ala fai lea o le mea tele lea, e le o atoatoa le lagolagoina e latou uma o lo o faafeagai tonu ma le galuega lea. Na o se faamalamalamaga lea e tatau onaí í

**FOFOGA FETALAI:** Ia se i tulai mai le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, i le mataupu lava lea i tipe e tele ia o le a alu foi i le Komiti Faufautua. O lea ua saunoa le Taitaifono, o le Komiti Faufautua o le tagata e poto faapitoa. Lau Afioga i le Fofoga Fetalai, o le upu moni lava o le a fai ai foi o outou tulaga faapolokiki ma totofi mai sui usufono. Ioe, pei o Komiti Faufautua ia e i ai nei toeitiit sefulu miliona tipe a le atunu o lo o alu ai. Lau Afioga i le Fofoga Fetalai, o le mea lea lau Afioga i le Taitaifono se i silasila totoa ane i ai. O le mea ua tau leai ni a tatou tipe aemaise o a tatou aitalafu o lo o i ai, ina ia silasila ma aveese lena mea o le Komiti Faufautua a ua lava le Komiti Faatonu e pei ona auamai i le Tulafono Tau Faaofi.

**FOFOGA FETALAI:** Ua maua le finagalo o le sui usufono ma ua uma foi ona faamalamalama mai e le Taitaifono. Se i tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ua ou talanoa soo lava i le mataupu lenei o le Komiti Faufautua a le tatou Malo, i le taua o toeaiina nei e tapatapa i ai le Malo. O le toatele o i latou o toe ulutaia o Samoa o lo o i ai le tomai e moomia la latou fautua e pei lava o mea masani. E pei ona aumai i totonu o le Tusi Paia, na tapa e Reopoamo le fautua a toeaiina, na tapa fautua a taulelea, ona mulimuli lea o le tupu i fautuaga a taulelea na matua malaia atoa ai le Malo o Isaraelu.

O le ala lena e moomia ai e lenei Faigamalo tagata tomai, matutua ma toeulutaia e lava lo latou tomai e anoa ai mea fai a le tatou Malo. O le a avatu se faataitaiga, e i ai le Komiti Faufautua a le tatou Malo ua fautuaina le Malo e matua toe fai lelei a tatou measina, tuu ia mea o ietoga foi nei se i tulou lava le Maota nei, e tatala atu e ai e mogamoga ma isumu na measina, ona faatu ai lea o le Komiti lea, o i latou tonu nei ua toe faatu ai le tulaga o measina a le atunu lenei. Na faatu le isi Komiti Faufautua lea e alalaga ai pea le atunu i le fai mai o le manaia o le latou polokalame lea e sau i luga o le leitio e faamamaavega. E tele le mau fautuaga lelei lea ua oaoa ai i Faleseu ma aeae ai i maaomalaie lo tatou atunu.

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

O le isi fautuaga na aumai, ia aua ne i toe auamaia ni pusa apa eleni 48 ae tuu i lalo i le 24. O lea foi la ua i ai le isi fautuaga mai le Komiti ua lava ia le tai 4 apa eleni i le pusa apa, ua atili ai ona manaia ma mafai ai ona e alu e ave lau sii i le 100 pusa apa nao le tai 4 eleni i le pusaapa.

Ua outou vaai la i ai i le taua o Komiti Faufautua nei e aumai, ao lenei e saga ita ai lava lenei tama o Palu. O le tulaga lea e aumai e le Minisita o le Doctor a o lea e tei ai le Dentist. Ou te ofo foi, a o lenei e matua malamalamama lelei le atunu i mea nei e lua lea e faavae mai i le alagaupu ðprevention is better than cureö. O le puipuia e sili atu i lo le tau togafitia. E i ai le vaega o le soifua maloloina o le latou lava lea mea e fai o le togafiti. O le isi togafitiga e tui atu ua le ola ae oti, ona pau lava o le sasi, a o le isi ituaiga fofolea, puipui tagata mai le mamai lea na saunoa manino i ai le Afioga i le Doctor o le Doctor ae tetee i ai le Dentist. E oo mai i le taimi lenei, e tatau ona fai se faasalalauga aloaia i totonusi o lenei Maota, o le tele o tatou ia ua mamai oloa/nifo, o le le lava o le faamalamalamaga e i latou nei e i ai le poto faapitoa i mea tau nifo. O le mea lea í se i faauma atu lau mataupu lau Afioga i le Fofoga Fatalai.

**FOFOGA FETALAI:** O lea o le a uma ona ou avatu lea o le avanoa lau Afioga.

**Afioga Hon AEAU PENIAMINA LEAVAISEETA:** Ia lelei..

**Susuga Hon TUILAEPA FATALOFA LUPESOLIAI AIONO NEIOTI SAILELE MALIELEGAOI:** O le mea lea e mamai ai nifo o tagata aemaise lava i tatou nei ona e le o lava le faamalamalamaga. A fufulu nifo, ona tu faatafa lea o le pulumu ona fufulu lea o mea ia o aano e sosoo ma nifo. O le tele o tatou tagata ia e ave e tasei nifo, e leai ma se mea o mamai ai nifo ae mamai gums, ae mafua mai i le vaivai o le faasalalauga a i latou nei o fomai nifo talu ai le fia oso mai fua i inei i le Palemene ae le fai a latou galuega. A fufulu nifo e faasipa le pulumu ona fufulu ai lea o le va o nifo ma gums, a fai le mea lena e te oo lava i le 120 tausaga e leai lava ma se nifo o pau. O le mea lea o le laa atu fua o le Fomai Nifo i le Fomai e atoatoa i ai le puipuiga ma le togafitiga.

Lau Afioga i le Fofoga Fatalai, na o se faaopoopoga a o lea o le a faauma e le alii Fomai.

**FOFOGA FETALAI:** Se i tulai mai le Sui Taitai o le Itu Agai.

**Afioga Hon AEAU PENIAMINA LEAVAISEETA:** Lau Afioga i le Fofoga Fatalai, e faamalulu atu foi i le faafofogaaga ae se i faasao muamua lava le saunoaga. Na o le fautuaga i le Afioga i le Palemia, vaai mea e te silafia lelei, aua o oe o le Fomai o Tupe, ae ua outou iloa le mea lea e tupu nei i le Malo i lalo o le vaaigaí ua oi le atunu i tupe e le o lelei na fai, ae leai lava ma se isi o oi o ola.

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

Lau Afioga i le Fofoga Fetalai, na ona ou toe fesoasoani atu i le matou mataupu, e te silafia foi o le faafetai i le Afioga i le Palemia, ona pau lea o se Komiti o le Soifua Maloloina ua i ai le Afioga i le Palemia, aisea? E taua tele la le Komiti lenei, ae ua outou silafia le mea e taua ai? O le sailiga o tupe. Ok, so we have the Board, special one, we have the foundation. Ou te faafetai tele, faafetai i lou afio mai. Ua outou maua mai le taua o le foundation lea ou te fai atu ai? O le sailiga tupe i uta i le falemai e le lava, e taua la, e ui lava o le suafa o le Taitai o le atunuue ae sue tupe i uta i le falemai, aumai ina ia maua a tatou tupe. O le agaga lea lau Afioga i le Fofoga Fetalai i le foundation, e taua, e pei ona ou fai atuú pau o le mea na ona toe tilotilo leaga e i ai Fomaií .

**FOFOGA FETALAI:** Malie le sui usufono se i tulai mai le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga, ua matua sese atoa le faamatalaga o le Tulafono Tau Faaofi. O le ala lea na ou tulai atu ai, ua atili sese ai le faamatalaga o le Tulafono Tau Faaofi, e le o se galuega lea na faatu faapitoa ai o le suetupe. Ia se i vaai i ai i le sese tele o nei faasalalauga. O lea o le a taumafai e toso i le suegatupe. O le mea lea na ou fai atu ai lau Afioga, o le manino ia o le saunoaga a le Minisita mo le Soifua Maloloina, i le tulaga o le vaevaeina o tiute. Ae manatua foi e lua lava tiute i soo o se atunuoo le lalolagi i le tulaga o le soifua maloloina, togafititia, puipuia. O le puipuia la lea e masani ona le ano i ai Fomai, na o le pau lava le mea lea e i ai na o le tui, ave i ai fualaau ma tatipi tagata. O le ala foi lena e tulai mai ai foi le isi tomai lea faa-fomai the whole will per feed po o le natural doctors e faavae i luga o taumafa ona o le tulaga lea e le na o mea ia e fofo ai mai. O le talitonuga, o taumafa e mafua ai ona mamai tagata o taumafa foi e toe mafai ona fofo ai le gasegase. O le ala lena e taua ai i le faatupu manatu i le Afioga i le Minisita ma le latou Matagaluega, ina ia faatu le Faalapotopotoga lea ina ia ave le faamuamua i le puipuiga ona e tau mai i le taimi lenei, e pei e foliga mai o lo o liliifa lava mafaufauga i le tiute lea o le soifua maloloina o le togafitiga, ae faamama i le tulaga o le puipuiga.

O lea ua mafua ai le laasaga tele ia vaelua mea tetele ia e lua ina ia eseese galuega e ave i ai le faamuamua, ae le faapea e o e suetupe. Lau Afioga i le Fofoga Fetalai, e matua sese tele lenei manatu, ia o lea e tulai mai le Minisita e faamaea le ma mataupu.

**Afioga Hon PALUSALUE FAAPO II:** Lau Afioga i le Fofoga Fetalai, mo le faasaoina o le taimi o le Minisita.

**FOFOGA FETALAI:** Ia o le a faamalamalama le Afioga i le Minisita ona avatu ai lea o le avanoa.

**19 MATI 2015**

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

**Afioga Hon PALUSALUE FAAPO II:** Ia leaga ne i manaomia e le Afioga i le Minisita se fesoasoani.

**FOFOGA FETALAI:** E leai e sili le soo fau.

**Afioga Hon TUITAMA TALALELEI TUITAMA:** Lau Afioga i le Fofoga Fetalai, ou te le manaomia se fesoasoani. Lau Afioga i le Fofoga Fetalai, o le mea tonu a lea ua ttau o le faatele, a silasila i le Tulafono Tau Faaofi, o le Komiti lea e tetee ai nisi o sui usufono mamalu i le Vaea 16, o lo o manino lelei na o le toatasi pe toalua, a o Komiti o lo o talau mai nei pei o ni Komiti e tai 40 tagata o le Komiti e leai, o lena e manino mai i le Tulafono Tau Faaofi o le Komiti Faufautua e aofia ai se toatasi po o le toalua. Ia se i vaai i ai na o se tamai Komiti lava lea e talagu ai nei, o le faasaoga lena o le Tulafono Tau Faaofi. Ou te fia asiasi ona o le manaia o le Lipoti a le Komiti lenei sa feagai ma lea vaega, mo le silafia foi o le mataupu lenei a le Health Promoting e i tua atu o lenei Tulafono Tau Faaofi e 10 tausaga talu ona fuafua mai. Sa feagai foi la ma le Afioga i le Taitaifono o lenei Komiti i lona ia foi taimi sa avea ai ma Minisita mo le Soifua Maloloina, ua matua malamalamala i vaega eseese o lenei Tulafono Tau Faaofi ona e le i faigofie foi, e le i faapaole foi ona tagofia e le Kapaneta lenei Tulafono Tau Faaofi, ua leva ona taoto i le laulau a le Kapaneta e silasila ma tilotilo i ai ma toe iloilo, o lea la ua oo i le taimi e tatau ai ona faatino aua ua talafeagai lelei ma ua uma ona asiaasia tulimanu eseese e aafia i totonu i lenei Tulafono Tau Faaofi. Mo le silafia o le Health Promoting lea ua taunu i ai na amata mai i le faaiuga a le Faalapoopotoga mo le Soifua Maloloina o le Lalolagi i le tausaga 1978. O i ina na fofoa mai ai le concept lea o le Health Promoting, ona e leai se isi auala e taugofie ai le soifua maloloina ma le togafitiga na i lo le prevention, ia taofia ina ia aua ne i oo atu i le tulaga e manaomia ai le togafitiga. O le 1978 na review atoa ai e le WTO ma faaiuina ai ua tatau ona agai le Lalolagi i le soifua maloloina uma o Malo taitasi i le auala o prevention ae aua ne i toe tupu mai togafitiga.

Ona alu ai alu ai lea oo mai i le 1996, na fono ai loa Minisita mo le Soifua Maloloina o le Pasefika atoa i Fiti i le aai e ttau o Yanutha Island, o i ina la na adopt pe na faavae ai le resolution po o le declaration lea e ttau nei o le Yanutha declaration lea e atoa nei le 20 tausaga i le tausaga lenei, e toe fono ai foi Minisita mo le Soifua Maloloina i Yanutha Island i le tausaga lenei e faamanatu ai le 20 tausaga talu ona faavae le vision lea a tama o le Pasefika i Saute, e faavae ai le concept lea e tau o le healthy island where people leave with freedom, free from deceases and surrounding with a clean oceans. O le vision lea o lea e taumafai ina ia taunu le miti, o le miti a Taitai o le tatou Pasefika atoa, ia maua se Pasefika e saogalemu.

**Tulafono Tau Faaofi o le Faalapotopotoga Faavae e Uunaia le Soifua  
Maloloina Lautele 2013 – iloiloga auiliili**

O le taunuuga la o ia mea uma, lea ua i ai nei le concept lea o le health promotion, aua a le faia, e le taitai ona oo tatou i se tulaga e tamaoaiga. E tatou te talanoa agai seleni e faaalu i le fuafuaga o le soifua maloloina, a o le mea moni lava, o le faitau lava ia ma le mea ua uma ona faamaonia, a healthy nation, is a wealthy nation. E le mafai e ni tagata mamai ona o e earn mai ni tupe, e le mafai e ni tagata mamai ona o e faigaluega. A o le mea lea ua i ai nei tatou, o lea ua agai i le vaega lea. Silasila i ai i le anoanoai o e ua puputa ma ua le mafai ona gaoioi ua le toe mafai ona toe o e fai ni maumaga ma nono, ua leai se earning power, aua foi ua mamai, ua suka, ua toto maualuga, ua mai fatu, ua cancer, o mea uma lava ia o lea e i totolu o le promotion lea e taofia ai le tulaga lea ma faaititia ai le aafiaga o tatou tagata, aua ne i toe tele se seleni e alu ai ma ia productive tagata ina ia maua le soifua maloloina lelei o le atunu ma mauoloa le atunu.

**Afioga Hon PALUSALUE FAAPO II:** Lau Afioga i le Fofoga Fetalai o se mea e fia faamalamalama.

**FOFOGA FETALAI:** O lea o le a uma mai le Taitai o le Itu Agai ona avatu lea.

**Afioga Hon TUITAMA TALALELEI TUITAMA:** A o le tulaga lea e tau laga mai, e foliga mai ua i ai nisi e tetee e le mananao e soifua maloloina le tatou atunu, e mananao ina ia mamai le tatou atunu ia aua ai ne i tele ni tupe e toe maua.

Lau Afioga i le Fofoga Fetalai ma le mamalu o lenei fonotaga, e moni lava tatou te faaataata a lafoga i faamatalaga e fai, a ia mautinoa foi, o nei saunoaga uma o le a pipii i totolu o faamaumauga a le tatou Malo mo tupulaga fai mai latou te tilotilo i ai, ia vaai i ai o ia lava lea na tetee i le mea lea, lea la ua tilotilo i ai i le mea ua tulai mai i le tatou atunu talu ai tagata faapenei.

Lau Afioga i le Fofoga Fetalai, na o se faamalamalamaga puupuu ae a manaomia, e le i taitai, o le mataupu lenei e le o se mataupu faigofie. O lea ua agai nei mo le silafia e le Maota lenei, o lea na tofia e le Director General le tamai Komiti mai le lalolagi atoa e toasefululua sui. Na o au la le sui o le Pasefika atoa, leai, o le mea moni, na o au lava le sui o le Pasefika atoa lea e represent ina uma le itulagi atoa lenei i totolu o le Komiti lea e 12 tagata. O le work force lea o le a fautuaina le Director General i ni fautuaga e faaitiitia ai mai ia le pipisi po o le NCDs. Ma o le fautuaga lea e agai i ai le Komiti lea i le taimi lenei, o le faamamaluina o le political, UNA political declaration lea ua uma ona table i totolu o le Maota lenei. I le vaega 44 o le declaration lena, o lo o faapea mai ai e saili auala e engage ai le community, ia private sector. Silasila la i ai, o le mea tonu lava lena o lea e fai e le promotion lea, engage the private sector ma le community e galulue faatasi aua a tatou le galulue faatasi le atunu atoa i le mataupu lenei, e le taunu lava le faamoemoe lea. E le mafai ona taunu.

**19 MATI 2015**

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

E le mafai e le soifua maloloina, o le ala lea o lea e taumafai ai e engage mai le fesoasoani a isi sectors, multi, sectoral, approach, all of government approach, all of country approach. O le faamoemoe la lena lea tatou te faamoemoe i ai, a o lea e maitau atu, o lo o i ai pea e e le o malamalamoa le vaai mo le lumana. Ia faamagalo ia i latou e vaivai. Lau Afioga, na o se faaopoopoga lea, ma le faaaloalo tele.

**FOFOGA FETALAI:** Malo faafetai i lau Afioga i le Minisita mo le faamalamalamaga manino.

**FUAIUPU 15: O fonotaga a Komiti Faatino.**

*Faamaonia.*

**FUAIUPU 16: Komiti Faufautua.**

*Faamaonia.*

**FUAIUPU 17: Malosiaga tuuina atu.**

*Faamaonia.*

**FUAIUPU 18: Ofisa Sili o Pulega.**

*Faamaonia.*

**FUAIUPU 19: Matafaioi a le Ofisa Sili o Pulega.**

*Faamaonia.*

**FUAIUPU 20: Tofinaina o le aufaigaluega.**

*Faamaonia.*

**Tulafono Tau Faaofi o le Faalapotopotoga Faavae e Uunaia le Soifua  
Maloloina Lautele 2013 – iloiloga auiliili**

**FUAIUPU 21:** Puipuiga mai le noataga tau le tagata lava ia.

*Faamaonia.*

**FUAIUPU 22:** Faaputugatupe o le uunaia o le soifua maloloina lautele.

**FOFOGA FETALAI:** Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Lau Afioga i le Fofoga Fetalai, ou te fia fesili atu i le Fuaiupu lea e 22. Muamua, e avatu lau faamalo i le Afioga i le Minisita i le tofaina o ia i le Komiti Faapitoa Faufautua lea e le UN, leaga le tagata e agavaa, ai lava o le malie o ana fagogo ia e fai. Ae faafetai, e lagona ai foi le agaga faagaeetia ona o le valaauna o lau Afioga. Ae o lau fesili i le fuaiupu lea, o lea ua tatou manino, manatua foi le Matagaluega o le Soifua Maloloina, a maoti nei ma pasia le Tulafono Tau Faaofi, ua vaefa ai i mai le mea sa i ai. Aua o lea ua i ai le National Health, le Ministry of Health, o le Kidney Foundation, o lea foi la o le a i ai ma le Health Promotion. O lona uiga, ua vaefa le Matagaluega. O lau fesili la i lau Afioga, sei toe tagai i ai pe aisea ona... pe o le mea ona o le le lelei ona faatino mai o le galuega mai le amataga pe a. O le tupe la lea, afai o lea ua saunoa le Afioga i le Minisita, o tagata faigaluega lava ia e tasi, aua o le galuega lenei prevention, e le o se mea fou. Na faatu loa le falemai fai loa le promotion. O lona uiga la, afai o lea o le a tumaoti, o le fesili la, o le a o ese mai la tagata ia e faia le galuega i le taimi nei e o e amata le mea fou lea? O lona uiga la aua o tupe ia o lea foi e faamoemoe i tupe e avatu e le Malo. O le fesili la lea; o lona uiga, na o ni nai tagata laiti foi ia e faaopoopo i tua, a o tagata la ia... aua o function lava ia e le faapea e toe suia. Ma le faaaloalo lava.

**FOFOGA FETALAI:** Malo. Lau Afioga i le Minisita, ona avatu ai lea i le Taitaifono.

**Afioga Hon TUITAMA TALALELEI TUITAMA:** A silasila le Afioga i le sui usufono mamalu, o le parakalafa lona lua o le Tulafono Tau Faaofi i laina mulimuli na e i ai, õO faatinoga i aso taitasi o le Faalapotopotoga faavae o le a tauaveina e le Ofisa Sili o Pulega ma le aufaigaluega a le Faalapotopotoga faavae o le a tofia e tusa ai ma le Tulafono. õ O lea lava e manino le ó lea e faapea mai o le a fa vaega, leai o lea lava e i lalo o le MOH. O le Pule Sili lea e faasino i ai le parakalafa lona lua lea e sau i le otootoga o le Tulafono Tau Faaofi lenei. O le faaaliga lea ma le faaaloalo i lau Afioga.

**FOFOGA FETALAI:** Malo faafetai.

**19 MATI 2015**

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

**Tofa LEALALEPULE RIMONI AIAFI:** Lau Afioga i le Fofoga Fetalai, atonu e le o maua mai e le Afioga i le Minisita le... O lea o le a fai lava le tumaoti. O le uiga o lau faamatalaga, o lea e i ai tagata o lo o faatinoa le galuega lea i le taimi nei. O lona uiga la, na o le transfer lava o tagata nei faatu le mea fou. A o la e o le a filifili le Pule Sili ma nisi tagata e faaopoopo. O le uiga la o lau faamatalaga, aua e le mafai ona faapea e sue mai ni tagata fou e omai e fai le mea lea. O tagata o lo o i ai le malamalamaga ma le tomai i le taimi nei i le galuega faatino, o i latou ia o le a omai e fai le mea fou lenei. O le uiga lena o lau faafesili, o lona uiga a oo nei i le Tala o le Tupe, o le uiga, o le a vavae mai tupe ia e i totonu i i e aumai e faatu ai le mea fou lea. O lona uiga lena, aua e le mafai ona duplicate services a?

**FOFOGA FETALAI:** Ia, o lea ua maua le finagalo o le sui usufono. Tulai mai lau Afioga i le Taitaifono o le Komiti.

**Afioga Hon GATOLOAIFAANA AMATAGA ALESANA GIDLLOW:** Lau Afioga i le Fofoga Fetalai, ou te lagona ua tele foi le fesoasoani i le saunoaga a le Afioga i le Minisita, ae moni le faafesili, o e o lo o faigaluega nei i totonu o le Matagaluega i le tulaga lea o le promotion, o le a o latou e faatu le Faalapotopotoga fou lea. Ma o le Pule fou, a o tagata o lo o i ai nei, ona o lo latou silafia ina ia atoatoa le faaauauga ma le continuation o le faatinoga o le galuega, le galuega taua lea o le health promotion. O lea, o le a na o le Pule fou ma ni tagata e faaopoopo i ai, a o e o lo o i ai le tomai ma le silafia o le a omai i i, a o tupe foi o lo o i ai i totonu o le Paketi a le Matagaluega e faaagaaga mo health promotion, o le a faapea foi ona vavae mai i le Faalapotopotoga lea. Ou te lagona o le agaga tonu lava lena o le fesili. Faafetai.

**Afioga TOEOLESULUSULU CEDRIC POSE SALESA SCHUSTER:**  
Lau Afioga i le Fofoga Fetalai...

**FOFOGA FETALAI:** O le a le fuaiupu?

**Afioga TOEOLESULUSULU CEDRIC POSE SALESA SCHUSTER:**  
O le fuaiupu lava lea e tasi lau Afioga i le Fofoga Fetalai.

**FOFOGA FETALAI:** Tulai mai le sui usufono.

**Afioga TOEOLESULUSULU CEDRIC POSE SALESA SCHUSTER:**  
Faafetai lau Afioga i le Fofoga Fetalai mo le avanoa. I le faafesili i le Afioga i le Taitaifono, ona o lea e faailoa mai o tagata lava ia e tasi o le tele o latou o le a o e fai le health promotion foundation. O le fesili i le suesuega a le Komiti pe aisea ua le mafai ai ma e le i mafai e nei lava tagata i aso nei ma le taimi ua tuanai ona faaleleia le galuega sa latou feagai ai ua ala ai ona latou faapea mai a le faia le foundation lea e le lelei.

**Tulafono Tau Faaofi o le Faalapotopotoga Faavae e Uunaia le Soifua  
Maloloina Lautele 2013 – iloiloga auiliili**

O lou talitonuga, afai o tagata lava nei e tasi lea latou te faatinoina i le taimi lenei ma taimi tuanai galuega ae le i lelei, o lea e i ai le naunautaiga, po o a noatiaga ua ala ai ona le mafai ona latou faatinoa, ae o lea e pei ona saunoa le Afioga i le Minisita ma nisi foi o faamaumauga, o lea e alualu i luga le fuainumera o tatou tagata mamai. A o tagata lava nei o lea sa latou tapenaina ma faatinoina. Ae afai la o le a fai le foundation fou, o lona uiga la o le a tetele o latou totogi ona o nisi o latou pe principal pe senior a o lea o le a oo i le ACEO level, o le a tetele totogi, a o galuega lava e tasi, a o tagata foi e tasi. I le suesuega a le Komiti, o le a se vaega fou o le a mafai ai ona faatino e nei tagata ae le i mafai ona latou faatinoina muamua.

**FOFOGA FETALAI:** O lea ua maua le finagalo o le sui usufono. Tulai mai lau Afioga i le Taitaifono o le Komiti.

**Afioga Hon GATOLOAIFAANA AMATAGA ALESANA GIDLLOW:** Lau Afioga i le Fofoga Fetalai, i le taimi lenei, e le o taitai ona lava tagata o lo o faapitoa lava mo le agaga lea o le health promotion, e le o taitai foi ona lava seleni o lo o ave faapitoa lava mo le uunaia o le soifua maloloina. A o le tulai mai o le Faalapotopotoga lenei, o le a faaopoopo seleni, o le a focus lava le galuega i le agaga o le Faalapotopotoga pei ona tulai mai ai. O le aumaiga la o tagata o lo o i ai nei i totonu o le Matagaluega, e fesoasoani tele i le latou tomai ma le silafia o i ai nei ina ia faamautu le concentration i luga o le uunaia o le soifua maloloina, e pei ona i ai le agaga o le Faalapotopotoga. Aua o lea pei ona saunoa foi le Afioga i le sui usufono mamalu, ua fia tausaga o tatou i ai pea i le tulaga lea pei ona i ai nei, e le o i ai se suiga. Ua tatau la ona tatou vaavaai, o lea foi ua faamanino mai e le Afioga i le Minisita mo le Soifua Maloloina, ua tatou vaavaai faalelei i nisi auala se i sui ai ma tatou taumafai ai e foia le faalavelave ua atili ona tulai mai i totonu o le tatou atunu. Ia, o se toe faamalamalamaga lea.

**FOFOGA FETALAI:** Malo faafetai. E manatu ua manino ma malamalamala le atugaluga o le fesili a le sui usufono.

*Faamaonia le Fuaiupu 22.*

**FUAIUPU 23: Teugatupe i faletupe.**

*Faamaonia.*

*19 MATI 2015*

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

**FUAIUPU 24: Tuusaunoaga mai lafoga.**

*Faamaonia.*

**FUAIUPU 25: Faamoemoega o foai faameaalofa.**

*Faamaonia.*

**FUAIUPU 26: Tala o le Tupe.**

*Faamaonia.*

**FUAIUPU 27: Faamatalaga tau tupe.**

*Faamaonia.*

**FUAIUPU 28: Lipoti faaletausaga.**

*Faamaonia.*

**FUAIUPU 29: Faiga e faagaoioia ai.**

*Faamaonia.*

**FUAIUPU 30: Iloiloga o le faatupeina.**

*Faamaonia.*

**FUAIUPU 31: Faamatalaga sese.**

*Faamaonia.*

**Tulafono Tau Faaofi o le Faalapotopotoga Faavae e Uunaia le Soifua  
Maloloina Lautele 2013 – iloiloga auiliili**

**FUAIUPU 32: O tupe toe totogi.**

*Faamaonia.*

**FUAIUPU 33: Soligatulafono a le faalapotopotoga tuufaatasia.**

*Faamaonia.*

**FUAIUPU 34: Tulafono Faatonutonu.**

*Faamaonia.*

**FUAIUPU 35: Fesiitaiga o tagata faigaluega, alaoa ma aseta.**

*Faamaonia.*

**FUAIUPU 36: Teuteuga faatupulaia.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Tulafono o le Faalapotopotoga Faavae e Uunaia le Soifua  
Maloloina Lautele 2013.**

**FOFOGA FETALAI:** O lo o i ai le Faasaoga a le Komiti i le Fuaiupu 1  
ma le Igoa e pei ona faaalia i le Pepa Faaopoopo o Galuega.

Tulai mai lau Afioga i le Taitaifono o le Komiti.

**19 MATI 2015**

**Tulafono Tau Faaofi o le Faalapotopotoga Faavae e Unaia le Soifua  
Maloloina Lautele 2013 – iloiloga auiliili**

**Afioga Hon GATOLOAIFAANA AMATAGA ALESANA GIDLOW:**  
Lau Afioga i le Fofoga Fetalai, ou te faatu le Faasaoga i le Fuaiupu 1 ma le Igoa e faapea:

**“FAASAOGA:**

*Ia aveese le fuainumera “2013” ma suia i le fuainumera “2015”  
ma faitauina ai le Igoao le Tulafono e faapea:*

**Tulafono o le Faalapotopotoga Faavae e Unaia le Soifua  
Maloloina Lautele 2015.”**

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o le Faalapotoptoga Faavae e Unaia  
le Soifua Maloloina Lautele 2015 faatasi ma le Faasaoga.*

**TULAFONO TAU FAAOFI O FAIAOGA 2015  
- faitauga faalua**

**FOFOGA FETALAI:** Tulai mai lau Afioga i le Minisita o Aoga, Taaloga ma Aganuu.

**Afioga Hon MAGELE MAUILIU:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Faiaoga 2015,  
ma ou te fia tautala faamalamalama i ai.*

*Faaluaina e le Sui Palemia, Minisita o Pisinisi ma Alamanuia, Minisita o Fesootaiga ma Faamatalaga Tekonolosi, Minisita o Galuega, Felauaiga ma Atinae Eseese ma le Minsita mo Leoleo ma Falepuipui.*

**FOFOGA FETALAI:** Tulai mai lau Afioga i le Minisita o Aoga, Taaloga ma Aganuu e saunoa faamalamalama i le Tulafono Tau Faaofi.

**Afioga Hon MAGELE MAUILIU:** Lau Afioga i le Fofoga Fetalai, o le folasia o lenei Tulafono Tau Faaofi, e taua tele le Tulafono Tau Faaofi o Faiaoga 2015 i le Maota o le Palemene o Samoa. Ua avea ai lenei taeao o se tasi o taeao faitauina i tala faasolopito o Aoga i totonu o le atunuu.

**Tulafono Tau Faaofi o Faiaoga 2015**  
**- faitauga faalua**

Ua ou manatua ai upu o le Faasaleleaga e fai i aso faapenei ðUA lau i ula, lau i toa le tale na i Amoaö. A o upu foi o le Gagaifomauga o le Itumalo o lau Afioga i le Fofoga Fetalai, ðse aumaia le maa lei se i fola ai o matou maota ma laoaö. O le taeao la lenei, ua lau i ula ae pou i toa ae fola i le maa lei le tale o Faiaoga o Samoa. O le tumutumuga lea o galuega tetele sa feagai ma lo tatou Malo i tausaga e tele i le atinaiiina ma le siitia o le tulaga o aoaoga a le tatou atunu. O le tale sa fau ao ma fau po, ae poutou i poututoa e lima.

Muamua, o le faasoa lima lelei e le faatuaoia pe faailoga tagata, po o fea lava le tafa o Samoa e i ai ona tagata e oo lava i ai aoaoga Tulaga Lua ma Aoga Kolisi.

Lua, o Aoga anoa ma faaalia ai le poto ma le tomai lautele, o le poto salalau ma matata faapitoa.

Tolu, o Aooga e lelei faatino e fua i le tomai ma agavaa e faaaoga ai so o se ala manuia ma auauanaga e ala i faiga faavae lelei.

Fa, o aoaoga talafeagai e manuia ai le tagata lava ia ma le atunu lautele.

Ma lona lima, o aoaoga e nafa-taulimaina faauau e ala i le faasoa lelei e tagata faiglauuega o tupe ma alaga oa.

Lau Afioga i le Fofoga Fetalai, o le talitonuga o le Malo ma le Matagaluega, e le sili le maualuga o le aoaoina o le tamaititi aoga, i le maualuga o le aoaoga ua ausia e Faiaoga. O le lima tausaga lenei ua savalia, sa ave ai le faamuamua i faiga faavae e siitia ai le tulaga aoaoina o Faiaoga mai le Tipiloma sa i ai i le Tikeri, o tulaga lelei o totogi ma le faaleleia o le siosiomaga e galulue ai Faiaoga e ala i le lava o alaga oa e faatino ai a latou galuega faapea foi ma aoga faauau ina ia ogatasi ai le tomai o o tatou Faiaoga ma aga tausili o lo o faaaogaina e isi atunu o le Lalolagi.

O galuega faauau pea ia aua e le i fausia Roma i se aso e tasi, peitai o lea ua amata ona fua mai i fua lelei. E 12 faiaoga sikolasipi i atunu i fafo mo le Matematika ma le Sainisi o le tausaga lenei. O le tausaga fou e 15 sikolasipi ua fuafua mo sikolasipi i fafo mo le Matimatika lava ma le Sainisi lava, e 60 sikolasipi o Faiaoga o lo o galulue ma aooga in service i le Matematika ma le Sainisi i le USP, e maea a latou aoaoga i le ogatotonu o le tausaga fou. O lo o galulue foi le tatou Iunivesite aua le faateleina o avanoa mo Faiaoga i le Bachelor of Science e major i le Chemist, Biology and Physicsí

**FOFOGA FETALAI:** Ua ou vaelupeina le saunoaga a le Afioga i le Minisita, e faamalulu atu i lau Afioga, ona o lea ua tatou taunu tonu lava i le tatou taimi malolo, o le a faauau le folasaga manino ma le folasaga matagofie pe a tatou taliu mai i le tatou malologa masani.

Ou te faasilasila atu o le a faataatia ese Taualumaga a le Fono Aoao mo le faatinoina o le sailiga malosi mo lenei taeao.

*Na faataatia ese Taualumaga a le Fono Aoao mo lana malologa masani i le itula e 10:45 i le taeao ma toe amataliao i le itula e 11:52 i le taeao.*

**Tulafono Tau Faaofi o Faiaoga 2015**  
**- faitauga faalua**

**FOFOGA FETALAI:** E maualuga le taofi ua faafoisia le malosi o le tino talu le tatou malologa o le taeao. Ou te manatu foi o lea ua maea ona palegaauau le taliga o le sua ma le tautega, o le agaga lena o le Afioga Failautusi o le Fono, e lelei pea le faagasoilo o a tatou Fono ma vavae foe ma fai a tatou faatiliga malosi e fai foi sina ogaoga ma le tele ma anoanoai o tulaga sa tatou soalaupuleina i le taeao, ou te manatu ai ua maua lo outou malosi i lenei taimi o le aso.

E faia le tatou malologa o lo o faagasoilo le saunoaga a le Minisita o Aoga, Taalogia ma Aganuu e uiga i le Tulafono Tau Faaofi o Faiaoga 2015, o lea ou te toe tapa ai lau Afioga i le Minisita ina ia e tulai mai e toe faaauau le tolaulauina o lenei Tulafono Tau Faaofi taua.

**Afioga Hon MAGELE MAUILIU:** Faafetai i lau Afioga i le Fofoga Fetalai, faafetai ua maua le faasiliaga malosi i le maea ai o le taumafataga ti o lenei taeao. Ua talafeauga foi lava le maua o le malosi o le Fono, ua outou silasila mai e tele lava le folasaga.

Lau Afioga i le Fofoga Fetalai, e malolo le Fono o ou faamatalaina atu atinae a le Matagaluega i le taumafai o a tatou sikolasipi ma aoaoga maualuluga atu mo a tatou Faiaoga mo le Matematika ma le faa-Saienisi lea e i ai sikolasipi nei mo nai faiaoga o lo o galulue ma aooga i le USP e i ai le faamoemoe o le ogatotonu o le tausaga fou e faia ai le faauuga mo i latou nei. O le faaiuga foi o le tausaga lenei e iu mai ai a tatou faiaoga e 50 i le tatou polokalame masani a le Iunivesite i le F.O.E, o le a iu mai ai faiaoga e 50 mo a latou Tikeri ma faasee atu loa mo a tatou Aoga Tulagalua. E 117 tama ma teine faiaoga ua lesitala mo le tausaga faavae mo faiaoga i le tatou Iunivesite o le tausaga lenei, o se numera maoae tele lea. E mai le 117 e 48 i latou e maua le togi po o le Grade 4 agai atu i le Grade 12 i le tausaga 13. O se mea maoae foi lea ua tupu mai ona o i latou e masani ona ulufale i le tausaga faavae o le tatou Aoga o le Iunivesite, o i latou i le va o le Grade 16 i le Grade 18 i le suega o le Tausaga 13. O suiga tetele ia ua faataatia e le Malo ma le Matagaluega, e siitia ai le profile po o le vaai lautele a tagata i le faiaoga Samoa, lea ua mafua ai le agai o tamaiti e toatele ma toe maai mafaufau e tauave le galuega faa-faiaoga.

O le Tulafono Tau Faaofi lenei ua i le Maota, o le tumutumuga lea o galuega faaauau a le Malo ina ia siitia maualuga le tulaga o faiaoga e pei ona i ai Loia, Suetusi, Fomai ma Inisinia. O le a le toe ulagia pe amusia faiaoga ma fai mai e le aoga, e ui lava ina tele galuega lelei o lo o latou faia. E manatua e le Maota lenei le pese a Faiaoga õE tagi e le fatu, le fatu ma le eleele. Ua fai au, fai au ma ou fala seesee. Samoa e aua e te mateletele, o ita ua masani, masani i le faiva o see. Tiga ona sii, sii ita i luga, o faiaoga, o faiaoga le aoga. Silasila i le faafanua o galuega o lo o ua fua. Amuia lava le masina e alu ma sau, a o le ipuvai ua masaa ua maimau. Le tauemua o si o ta igoa i motu e tele o Samoa. O le pese lea na fatuina ma usuina e si toeaina faiaoga mai le Gagaemauga i Savaii.

**Tulafono Tau Faaofi o Faiaoga 2015**  
**- faitauga faalua**

Lau Afioga i le Fofoga Fetalai, afai o faafogafoga mai faiaoga o Samoa, o lou taeao lenei ua tapena e lou Malo, o lou igagato lea ua tapena e le Matagaluega. O le a le toe avea outou ma fala e see, a o le fala tautele, o le saofaiga a le Au Sikola ma Agavaa taualoa i Samoa ma atunu i fafo. O le Tulafono Tau Faaofi o Faiaoga 2015, o le a aloaia faale-tulafono le lesitalaina ma le laiseneina o Faiaoga uma i totonu o Samoa ma Faiaoga o le Malo, Faiaoga o Aoga Tumaoti, Aoga a Ekalesia ma Faiaoga o Aoga Amata. E le aafia pe aofia i le Tulafono Tau Faaofi Faiaoga o le Iunivesite ona o lo o i ai lava la latou Tulafono e faatonutonu ai tomai ma agavaa o Faiaoga o le tatou Iunivesite faapea foi ma Aoga Faapitoa o Matata Eseese. O le a faavaeina le Fono a Samoa, Teachers Council e 13 ona sui auai e nafa ma le lesitalaina o Faiaoga, faamatuu atu o laisene e faiaoga ai, puipuia o aga tausili, professional and ethical standards , ausia o auala mo aoaoga faaauau mo Faiaoga, continuing professional development, taimua i le faalauiloaina o le galuega faiaoga ma ona agavaa i aga tausili.

O le faiga fou lea e suia ai le faiga o i ai nei, o lo o fai pea e le Matagaluega o Aoga, ma o le a tulaga tutusa ai tatou ma Niu Sila ma Ausetalia ma isi atunu o le Lalolagi. A maea ona lesitala se Faiaoga ma tuuina i ai e le Fono a Faiaoga o Samoa, Teachers Council, se laisene e agavaa ai o se Faiaoga, ona ave lea o le fautauga i le Komisi o Galuega lea e nafa ma le faafaigaluegaina o tagata o le Malo, o lea fautuaga e logoina ai le Komisi o Galuega, o lea Faiaoga ua agavaa e faafaigaluegaina o se Faiaoga. O le a faavaeina ai foi le Komisi Faamasino mo Faiaoga, e tolu ona sui auai e nafa ma le soalaupuleina o ni apili mai Faiaoga i se faaiuga a le Fono a Faiaoga Samoa, i mataupu tau lesitala, laisene e faiaoga ai, le tausisia o le amio talafeagai ma nisi faaiuga a le Fono o Faiaoga Samoa e aafia ai le galuega a le Faiaoga. O lea foi faiga o le a suia ai le faiga o lo o faia nei e le Matagaluega ma o le a tutusa pau ai foi tatou ma atunu i fafo.

Lau Afioga i le Fofoga Fetalai, o le Tulafono lenei, o le Tulafono e faapolofesa ai le faiaoga ma lana galuega faatino, e le o se Tulafono e faafaigaluega ai se faiaoga aua o lo tumau pea lea matafaioi i Komisi o Galuega a le Malo. O le agaga o lenei Tulafono, ia lelei le auaunaga o faiaoga aua le aoaoina lelei o alo ma fanau o le lumanai o aiga, nuu, ekalesia ma le Malo. Fai mai se tasi o tama o lou nuu, o le tama lea e pule aoga lona faletua, fai mai, õfaafetai i le Malo i nei suiga lelei ua tulai mai i aoga, ae pau lava lea, ia outou alolofa mai, ua tolu masina ma te le o toe momoe ma lou toalua, e fai ana meaaoga i le po atoa ma moe ai lava i luga o le laulau ae ou moe toatasi lava.ö O le feau lea e aumai e le tama o lou nuu, ua galue faapolofesa lou toalua, ua le o toe tutusa le galue, ua tapena lelei le galuega o ia o le pule aoga, toe tapena lelei ana lesona, o ia o le faiaoga. A o tua atu o le tina lea, o lo o i ai le tama o la e tapuai ma tatalo ia manuia faiva o tina. E taua le mea lea, ona o le 80% o faiaoga Samoa, o tina. E faamoemoe le taunuuga lea ia tatou. Tatalo ma tapuai. Ia aoaoina tatou ia mafai ona lava ona moe toatasi, ae tuu le avanoa i tina e tapena ai mo le fanau.

**Tulafono Tau Faaofi o Faiaoga 2015**  
**- faitauga faalua**

Lau Afioga i le Fofoga Fetalai, o se faamatalaga lena i le agaga o le Tulafono, ma o se otootoga o vaega tetele o le Tulafono Tau Faaofi o Faiaoga 2015, o se Tulafono e manino i le faitau i gagana e lua, e le umi foi, o le a vave foi la ona see atu i le Komiti aua o le a le tele ni lauga, na o le lua lava lauga o lea e fia faafogafoga i ai le Malo mai le Itu Agai, a o lauga foi ia e lua o le a ou matuai faalogo i ai ma le totoa ou te le faalavelave foi i ai. O lauga ia e lua a le Itu Agai, o le lauga a le sui usufono mo Faleata Sasae ma le se tasi o sui usufono mo Salega, Afioga Afualo Wood Utu Salele, na o le pau lava ia o faiaoga faauu na e i le itu lena, faiaoga ua faauuina, e masani i le faiaoga, e manatunatu faafaaiaoga, e lagona faafaaiaoga, e masani i luitau faafaaiaoga, e mitamita i le faiaoga. Ia manuia a oulua lauga, ma lou faaaloalo tele lau Afioga, manuia le Fono.

**FOFOGA FETALAI:** Malo faafetai saunoa malamalama i lau Afioga i le Minisita mo Aoga, Taaloga ma Aganuu, ma e manatu foi ua manino ma malamalama le faatofalaiga a lau Afioga, ou te manatu foi ua usitaia lelei e le Itu Agai le tatalo mai a lau Afioga i le Minisita, ae malie, o lea o le a muamua atu le loia, o le a muamua lauga atu le Afioga i le alii loia, se tasi o sui usufono mo Vaimauga Sisifo, Tofa Lefau Harry Schuster, tulai mai lau Afioga i le sui usufono.

**Tofa LEFAU HARRY SCHUSTER (Vaimauga Sisifo):** Lau Afioga i le Fofoga Fetalai, leai e na o se manatu laitiiti lava, ae o le manaia ia o le Tulafono, manaia le folasaga a le Afioga i le Minisita, ae ua tau pio laitiiti lava ua soli e le Minisita le tatou faavae foi lea ua faapito, ona o lea ua faasino i se tasi o sui usufono mo Salega, Afioga Afualo Wood Utu Salele ma le sui usufono mo Faleata Sasae sa faiaoga, leai e le o seí ..sa ou teacher foi i le University foi lea i Victoria sa ou faiaoga foi la, a o lea ua le lavelavea mai i le classification o faiaoga. Na o le pau lena o se tala e fia fai atu, ae manaia le Tulafono.

**FOFOGA FETALAI:** Malo. Ia malie lau Afioga i le Minisita, o le a sosoo ma le isi loia. Tulai mai le sui usufono mo Faasaleleaga Nu. 2.

**Susuga PAPALII LIO FAAVAIVAIOMANU TAEU MASIPAU (Faasaleleaga Nu. 2):** Faafetai i lau Afioga i le Fofoga Fetalai, faafetai foi i le folasaga malamalama a le Afioga i le Minisita. Ae pau lava o lea, leaga o lea ua ta vavae mai, ia ae leai e fia lauga uma lava i le taua o le Tulafono, o le manaia o le Tulafono ma mea uma, o le ala foi lea o le fia faia o se manatu, ae faafetai tele lava i le folasaga manino a le Afioga i le Minisita i lenei Tulafono. Ou te talitonu lava ua leai lava se vaipanoa e le i oo i ai le saunoaga malamalama.

**Tulafono Tau Faaofi o Faiaoga 2015**  
**- faitauga faalua**

Ae i le Tulafono lava ia i le vaavaai, pei e auga agai i faiaoga pei ona e saunoa, pei e mafuli lava i le laiseneina ma vaavaaiga o mea e fai e faiaoga ma a latou amio, ia pei o le auga atoa lava na o le Tulafono i lau faauigaga ma lau vaavaai. Ae i ai itu ia sa ou manatu mamafa i ai o lea la ua pai i ai lau saunoaga. O le mea tonu lava ia o mea ia sa faaletonu i le Matagaluega, o mea ia o le Maths ma le Science lea ua pai i ai le saunoaga, ou te faafetai la i lau Afioga o lea ua lagaia mai aua e le o i totonu o le Tulafono na mea, ia ae o mea o galuega masani a Matagaluega lea la ua pai i ai lau saunoaga, faafetai, o lea foi ua faafogaga foi ma le totoa le Maota aemaise foi o lou sui usufono, o mea na sa popole i ai ma atumatagi i ai lou sui usufono, ona o faafitauli o lo o tulai mai i le taimi lenei i le Matagaluega, ae faafetai, o lea la ua amata ona see le sa o lea ua faaaoga o tatou faiaoga aemaise lava la i le Sainenitisi ma le Maths, ia o lea ua maua, o lea ua aooga faa-Sikolasipi nisi, o lea o le a omai e faatino, o lea foi ua recruit atu le isi vaega.

Ae pau lava le matou fautuaga, e lelei lava le folafola i totonu o le Maota ma faatino, lelei lava le fai ma faatino nei mea uma, aua o le taua lava o nei mea uma, o a uma le molemole ma le aulelei o le Tulafono, ae a lelei ona faatino, ia o le taunuuga lena o mea lelei ma mea uma, ia ae taua o lea ua matou maua, o le agaga lea ua folasia o lea foi ua malamalamala le mea sa atumatagi foi i ai lou sui usufono, o lea ua amata ona laalaa ma savalia e le Matagaluega, o lau foi vaavaai, ua manaia le maopoopo o le Pulega lea i le vaavaai atu i le toatele, a tau fai galulue faatasi la ma faatino uma mea ia e pei ona saunoa manino i ai lau Afioga, ou te talitonu o le a le toe i ai nisi faafitauli e tulai mai luma.

A o le fautuaga lava ia faa-sui usufono lava ia, ia faaaauau le faaleleia o tatou aoga, ioe, o le mea moni lava ia, vaavaai po o tofu uma potutusi uma faleaoga uma o Samoa ma le Maths ma le Science lea sa faaletonu, o mea na ia faatumu uma, faatumu uma ia faaaoga i ai a tatou seleni, aua tasi lea Matagaluega o lea e tele a tatou seleni ma ave i ai le faamuamua a le Malo ma tatou uma lava, ioe, o le aotauina o alo ma fanau o le atunuu, ia faatumu potutusi ma faletusi ma faleaoga uma i tusi Maths ma tusi Science ma mea uma, ia faatino mea uma o le mea taua lena, ma faaleleia mea e faatino ai a latou aoga. O le agaga moni lena o lou sui usufono, ia faaleleia atili. O lea ua manaia le Tulafono ua amatamea le Tulafono, faatino loa ia ma monitor ma faaaauau atili ma faalelei.

E i ai le aoga lea o Mataaevave le kolisi lea i Mataaevave, e i ai le meaalofa a lo matou nuu o Sapapalii ioe, o lea e faatino nei i le aoga lenei o le kolisi o Mataaevave, e tai \$5,000 i tausaga uma lava, ioe, e ui lava o le aoga a le Malo, ae le mafai ona faatafa ai lo matou nuu, ioe, o le matou nuu e agaga mo alo ma fanau e faatino le \$5,000 e ave e faalelei ai le aoga a Mataaevave i tausaga uma tausaga uma. E faatoa lua nei vaiaiso talu ai, ua uma ona o i ai matai o le matou nuu foai i ai le laptop ma le screen foi lea e fai ai mea o le protector, le laptop ma mea uma na, o la ua uma ona tuu aloaia atu i le Pule o le kolisi o Mataaevave, ua momoli mai le faafetai tele o lea o le a faaaoga mea ia e aoga mo le aoga.

**Tulafono Tau Faaofi o Faiaoga 2015**  
**- faitauga faalua**

O le agaga lena o lea e taumafai e toto atu, ioe, o lea ua amatamea Sapapalii, o lea ua ave e fai meaalofa i aoga o le kolisi o le tatou Malo, e fesoasoani i alo ma fanau o lea la ua faatino, ua lua nei vaiaso talu ai, o lea foi e faafofoga mai le Pule ma le aiga faiaoga i le kolisi i Mataaevave, ia o lena ua oo atu le meaalofa, o le isi tausaga lea, e ese le isi meaalofa lea o le a alu atu.

Ona ou oo ai lea íí ..o le isi mea sa tatou masani ai i aso ia, o lea ua ou le vaai atu i le Tulafono, o mea ia o asiasi aoga, aua o le tasi lea mea sa faatino i aso ia, e manatua foi o tama ia e pei e faafuaseia foi lele ona asi mai, a, e te i lava le faiaoga o la e tulemoe ua tu faafuasei le uila vilivae a le asiasi aoga te i lava ua minoi solo i totonu. O lea ua ou vaai atu, ua leai ni asiasi aoga, ae tasi lea tiute ese le taua, aua foi o tama pei e le taua taimi e asiasi ai i faleaoga, e te i lava i le tu faafuasei, ioe, a o lea ua ou vaai atu, pei ua leai lava pei ua aveese ea le tulaga lea, a? O le tasi lena itu o lea sa ou vaavaai pea ma ou faitau pea i le Tulafono, po o fea le mea o toe tau oso mai ai, ae ou vaai atu, ua leai ni mea e tau o School Inspectors, a, lea sa fai i aso ia sa asiasi solo i aoga i aso ia. Pei o le agaga lena o lou sui usufono, ae ese le taua, o le tele foi ia o le sao o asiasi aoga e asiasi ai faiaoga o la e faatalale ma faapena le faiga o latou tiute. Ia ae o le auga lava o nei mea uma lau Afioga o lea na pai i ai lau saunoaga, o le tupe, se ua iloa foi o le tilotilo a lelei lava le totogi o faiaoga, se pei o le a igoa le faatinoga o na mea uma, o mea uma lava nei e lelei lava mea uma pe a lelei ona fai totogi o nai faiaoga, ioe, o le mea taua lena. Se ou te fai atu po o le a lava le lelei o a tatou faufuaga ma mea tatou te tuu faatulafonoina, ae a tuu i ai ma faamanuiaga, ola, ou te talitonu o le a le vale ona tatou alu i luga. Ia manuia le Fono, faafetai i lau Afioga i le Fofoga Fatalai.

**FOFOGA FETALAI:** Malo faafetai saunoa i le sui usufono mamalu.  
 O lea la, se i tulai mai le sui usufono mo Aana Alofi Nu. 3.

**Afioga TOEOLLESULUSULU CEDRIC POSE SALESA SCHUSTER:**  
 Faafetai lau Afioga i le Fofoga Fatalai mo le avanoa, faafetai foi i le Afioga i le Minisita aemaise i latou sa tapenaina lenei Tulafono Tau Faaofi, e i ai foi le lagolago i le taua o lenei vaega ina ia faalelei ai e le gata i le aotauina o alo ma fanau, ia ae mafai foi ona siisii ai i luga le faatinoina o tiute ma galuega a alii ma tamaitai faiaoga. E pau lava nai vaega e fai ai se faafesili, ia ona o faiaoga o lea e taua mai faiaoga lesitala ma faiaoga ua maua ia faailoga faapitoa tau faiaoga, e i ai le vaega lea mo na o leí ..ou te tautalaí í e part time e faiaoga ai, e le i manaomia ni qualification ona e specific subjects o le mea foi lea aemaise o le taimi nei o le tele foi o nisi o mataupu e ono mafai ona part time ai ia specific subject ia nisi e le i aotauina faafafiaoga, ae ua i ai le tomai faapitoa i nisi o mataupu, e ao ona silasila i ai ina ia mafai pea ona maua le avanoa i nisi o taimi e le lava ai faiaoga a o i ai foi nisi e fia auaua i nei vaega taitasi.

**Tulafono Tau Faaofi o Faiaoga 2015**  
**- faitauga faalua**

Ona faaopoopo atu foi lea lau Afioga i le Fofoga Fetalai, le taua foi o lenei avanoa e mafai ona i ai se fesoasoani ai foi i le totogi o faiaoga, e talitonu o le tasi lea vaega ua ala ai ona tau le tele i latou aemaise lava i grades i le NUS e fia o e ave le faafaaiaoga ona atonu a silasila i ai e maualalo totogi o faiaoga, ae taua foi lenei Faalapotopotoga o le a mafai ai ona latou galulue e finauina le lelei o totogi.

Ma le vaega mulimuli lau Afioga i le Fofoga Fetalai i tulaga ia o functions o le Association lea po o le Council, e fautuaina ai foi le silasila i ai ina ia mafai foi ina i ai foi se leo o lenei Faalapotopotoga i le finauina ma le fesoasoani ina ia lava resources, pei ona taua e se tasi o sui usufono i totonu i le faatinoina o galuega faafaaiaoga, ona e matauina, o le tele o nisi o faiaoga e naunau e faatino galuega ia ae le o lava resources, ae ia i ai so latou leo e mafai ona fesoasoani ai e le gata o le Matagaluega a o nisi foi o aoga faale-Lotu ia ma nisi o aoga Private School, ina ia lava resources, ou te talitonu lava a lava le aotauina o faiaoga ma lava resources e faaaoga e faiaoga, e faapea foi ona alualu i luma suesuega a alo ma fanau, faafetai.

**FOFOGA FETALAI:** Malo faafetai saunoa i le sui usufono mamalu. Ia o le a lafo i le itu o le Maota lea i se tasi o sui usufono mo Falealili, Tofa Tusa Misi Tupuola, ona sosoo ai lea ma le sui usufono mo Vaisigano Nu. 1.

**Tofa TUSA MISI TUPUOLA (Falealili):** Faafetai i lau Afioga i le Fofoga Fetalai o le Maota, le mamalu o le Palemene o Samoa o lo o ua sasao nei. Ua ou tulai atu ma le agaga faaaloalo e fia fai foi se leo o lenei itumalo o Falealili i le Tulafono Tau Faaofi taua ua taoto nei i le Maota.

O au sa ou manatu ou te le tautala i le Tulafono ona ua malamalama le itumalo. Ae ua faagaeetia au i le saunoaga a le Minisita pei ua tuia ai lo ta loto i le taua o le saunoaga i lenei itula o le aso, ona o le taua ma le anoa ma le lelei au i luma o lenei Tulafono aua le galuega faafaaiaoga i totonu o le tatou atunu. Ona ou tau manatua ai lea o le upu lea sa tautala i ai le tupu o Tavita, lea e silafia uma e le Maota, ina ua faalogo i le Atua ma lana upu ona faapea lea, O le sulu lea i ou vae ma le malamalama i ou ala. O le taua lena o le Tulafono lenei i le vaavaai ma le silasila foi a le Maota. Ona o le taua, o isi lava upu e masani ai le atunu, e le o le fale ae o le anoafale e taua. O le faatulai mai la o le mataupu lenei e pei ona aumai e le Tulafono, o le faaleleia atili ma le lesitalaina ma le laiseneina o alii ma tamaitai faiaoga, ma le tomai ua mafai ona aoaoina ai i latou, aua o upu lava e masani ai le atunu, o faiaoga o le ioimata o mea nei o matua, leaga ua ave ia i latou le faatuatuaga o le atunu aemaise matua i le aoaoina o fanau. Ona faapea lea o se manatu faapuupuu lava o lenei itumalo. E lagolagoina e lenei itumalo o Falealili le Tulafono e pei ona taoto nei i le Palemene, aua se au i luma lelei o fuafuaga faataatitia, standards po o guide lines e puipuia ai ma faaauau le galuega faafaaiaoga, i le tulaga lelei mo le agai i luma ina ia popoto ma atamamai alo ma fanau a le atunu e pei ona i ai tulaga nei.

**Tulafono Tau Faaofi o Faiaoga 2015**  
**- faitauga faalua**

O lenei Tulafono lau Afioga, e manatu lava o se Tulafono ua leva ona tatau ona aumai i le Maota. Ae faafetai tele i lau Afioga i le Minisita. Faafetai i le Pule Sili ma le Pulega aemaise o le Matagaluega o Aoga ona o le vave tuuina mai o lenei mataupu ao lei maea le Paeaiga a lenei Palestene. O lea la ou te tulai atu ai ma lou agaga faaaloalo, i tulaga uma o lo o i ai komisi, le komisi a faamasino ma le komisi a le Matagaluega po o le Fono a le Matagaluega, e ao lava ona silasila totoa. Silasila totoa i agavaa aemaise le tulaga faaleleia o aoga uma i totonu o le atunuu. Ona e i ai isi taimi e pei e misi ai le vaai ma le silasila a le Matagaluega i le faaleleia o nisi aoga e pei o aoga i Falealili ma tua. E pei lava o upu e masani ai tatou. O mea e lelei i Apia e tatau foi ona lelei i Falealili ma isi afioaga i itumalo i tua. O lena ua ou tulai atu ai ma le agaga faaaloalo i isi vaega uma e pei ona aumai i le tatou Tulafono, e matua lagolagoina lava e lenei itumalo. Ia manuia tele lau Afioga ma le tatou Fono.

**FOFOGA FETALAI:** Malo faafetai. Tulai mai le sui mamalu o le Falevaisigano.

**Afioga TUFUGA GAFOALEATA FAITUA (Vaisigano Nu.1):** Faafetai i lau Afioga i le Fofoga Fetalai mo le avanoa. O lenei Tulafono lau Afioga e matua lagolagoina lava e lenei itumalo lona aotelega. Ae i ai lava au tamai fesili ia e fia malamalamama atili ai lenei sui usufono. O le saunoaga a le Afioga i le Minisita, lea na saunoa ai faapea, ua fasefulu tamaiti aoga i le grade 1, i le 4 i le 12 ua ulufale atu i le aoga faafaiaoga a le Iunivesete. O lea e fia malamalamama lau Afioga, po o le a tonu lava le grade e faagata ai ia tamaiti e ulufale i le aoga faafaiaoga. Ae po o le a foi ni grades o le mataupu faasaienisi ma le mataupu faamatematika o tamaiti nei, po o lona uiga ua atoa i i ia mataupu ia e lua. Aua o mataupu ia o lo o pau nei. Ao le tele o isi tamaiti masalo e atoa lava le 4 lea i le 12 o le tele lava o mataupu tau atisi. Ae e le o taua mai ai matapu ia o le Matematika aua o lo o pau maualalo pea ia maka o mataupu nei e lua. O le fesili la po o ua i ai i se faatulagaga o matapu ia e ulufale ai e tatau ona i ai le lua lea i grade ia ua saunoa i ai le Minisita. O le lua o fesili, o lea ua saunoa le Afioga i le Minisita i le Council lea e faapea ua i ai tomai e pei e administer ina faiaoga nei pe a uma ona laisene ma tulai mai foi pei se arbitrator po o se faamasino po o ni tagata foi e settle ina ni grievances a faiaoga. O le fesili la faamolemole, i mataupu ia tau criminal a faiaoga, pe o le a settle ai ii i le council lea ae o le a le oo mai i le faamasinoga, o le judicial. O le fesili la, afai o le a fai e le council lea, o le a gata ai ii ia solitulafono a faiaoga pe a tulai mai. O le fesili e tolu, ua aiaia e le Tulafono lenei aiaiga a faiaoga e maua ai laisene. O le fesili faamolemole po o i ai se avanoa e faamanuia ai faiaoga nei mo le agai atu í pe afai e finagalo e afio atu i fafo e faiaoga ai? Pe ua i ai la se faatulagaga e amanaia ai le laisene nei a faiaoga nei mo fafo, pe a finagalo i ai le faiaoga e agai i fafo mo le sailiga manuia. Ma le fesili mulimuli, o le fesili lava ia e fesili ai le tamaloa sa nofo i le fafine sa faiaoga foi, o mea ia tau totogi, pe a talafeagai ai ma le faasoa a le malo. Faafetai mo le avanoa.

**Tulafono Tau Faaofi o Faiaoga 2015**  
**- faitauga faalua**

**FOFOGA FETALAI:** Malie le sui mamalu, se i avatu muamua le avanoa i le Palemia. Tulai mai lau Afioga i le Palemia.

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Masalo lau Afioga na o le pau lava lea o si vaega taua lea aemaise le faafofoga faalauaitele mai a le mamalu o le atunuu i lenei Tulafono taua. E sao foi le Minisita ma le latou Matagaluega, o le isi lenei taeao, taeao fou i le tulaga i le siitia o aoaoga i Samoa. O le Tulafono taua lenei, ao le itu ou te faamamafaina lau Afioga i le Fofoga Fetalai mo le faafofoga mai o le atunuu, o le faaaogaina o le Tulafono, vaega 3. O le faaaogaina o le Tulafono lenei ua noatia ai uma e le gata o faiaoga a le Malo ae ua faapea foi faiaoga i aoga a ekalesia ma aoga tumaoti, ma nofoaga o aoga amata, sei vagana foi la le tulaga o faiaoga i aoga maualuluga i tau Iunivesete, ona o lea e faatonutonu i latou i Tulafono Iunivesete. O le itu taua ii i le faafofoga mai a ekalesia, o lea ua noatia uma lava i latou i le Tulafono lenei, i le siitiaga o tulaga e tatau ona lesitala ai faiaoga ina ia siitia le tulaga o faiaoga i totonu foi o aoga a ekalesia, siitia maualuga. O lona uiga na o le tasi lava le itutino o le a alu atu ai le faatagaga lea, na o le fono lea a faiaoga, o le aso lea e sau i lalo o le Tulafono ua faatuina i lalo o le Tulafono lenei. E aofia ai foi ma sui o aoga a ekalesia ma aoga i tua. O le itu taua lena ona i le tulaga o aoga i Samoa, o lea e maioio e le gata o aoga a le Malo ao le avega tele o lo o tauave e aoga a ekalesia i le tulaga ma le talitonuga foi o matua e ana fanau i le taua o aoaoga ma talitonuga faaekalesia e mafua ai ona faaaauau pea ia aoga a ekalesia, lea ua noatia uma i lalo o le Tulafono lenei, ina ia faatumauina ai le tulaga maualuga o faiaoga. O lea foi e avatu fesoasoani a le tatou Malo ina ia lagolago ai i taumafaiga o aoga a ekalesia, ina ia latou mauaina ni faiaoga totogi lelei i le tulaga o fesoasoani nei e avatu. Ma o lo o tupu pea fesoasoani ma le lagolago a le tatou Malo ona e le tusieseal le galuega e fai e ekalesia e lagolago mai i le tiute taua o le aoaoina o fanau a Samoa. O le toe faaopoopo atu lea lau Afioga i le Fofoga Fetalai. O le taua o aiaiga mo le pulea uma o faiaoga i lalo o le Tulafono lenei.

**FOFOGA FETALAI:** Malo. Faafetai tali faamalamalama i lau Afioga i le Palemia. O le a avatu le avanoa i se tasi o sui usufono mo Salega, Afioga Afualo Wood Uti Salele. Tulai mai lau Afioga.

**Afioga AFUALO WOOD UTI SALELE (Salega):** Faafetai i lau Afioga i le Fofoga Fetalai mo le avanoa. O upu masani a le atunuu aemaise le itulagi lea tatou te aumai ai. A sou le vai i Fuluasou sala ina sou ona o lea e toto ai le tia a Tautiaga, ae fai mai foi le upu a se tasi vaega o le matou pitonuu, na o Neiafu lava na mele ai le Toelau. Ua mafua ona ou faaaogaina upu ia, ona ua maea ona saunoa manino le Afioga i le Minisita. Faafetai i lau Afioga mo le Tulafono. So o se atunuu lava, o le auauanaga faafafiaoga o se auauanaga e tamalii lona faasinomaga, it has a noble cause.

**Tulafono Tau Faaofi o Faiaoga 2015**  
**- faitauga faalua**

E tatau la ona agai i ai le tapenaina aemaise lava i latou o le a faafailele lo latou tua eleele ma faafailele lo latou siosiomaga e le gata o le poto salalau ao aga tausili e mafai ai ona faatino ma momoli le feau lea e i totonu o le Maota lenei, le feau lea ina ia mafai ona ola aoaoina a tatou fanau mo le lumanai. Aua o le upu moni lava ia e le o po se lilo, o se atunu lava ia e ola aoaoina ana tupulaga ola soifua maloloina, e tali mai foi lona tamaoaiga i se tulaga silisili ona lelei. O lea ua agai tonu i ai le Tulafono, ona ua leva ona taoto ae faafetai o lea ua i luma mea. E lei moemoenoa foi ma nofonofo le Matagaluega ona o le tau tapenaina aemaise o le Minisita, ina ia mautinoa ua tali mai le manaoga lea. Aua o tatou, tatou te fai mai tatou te o, ae taoto fuafuaga ma faatatau mo le lumanai, ina ia mautinoa ua faaauau pea le lelei ona tali atu mo le ola aoaoina o a tatou fanau. I le taoto mai la o le Tulafono e ttau lau vaavaai i lalo o le Tulafono i aga tausili, e moni lava o lea ua i ai isi vaega ia, ae pei lava o isi vaega ia e ttau tele i le tulituli matagau o le Tulafono, ina ia mautinoa ua faamaoni le aufaigaluega i le faatinoina o le latou tiute. Ou te talanoa foi au ia o au o se tasi o le aufaigaluega, ta te lagona lava pe a le lelei ona faatino le pitolaau, ina ia mautinoa lelei ua oo le feau. Aua o faiaoga uma sei tulou lava lo outou paia ma le mamalu o tamalii ma failauga aemaise foi le paia o le atunu ua lautogia e avea lo latou faasinomaga lea e tautua mai ai i le atunu. O le ola aoaoina o fanau e le faigofie, o le matafaioi ua avatu e le Malo ma le Palemene ia te outou, ua avatu ma le loto atoa, afai foi ua le mafai ona tali atu e tusa o manaoga e pei o taui faaletino e ala i totogi ma mea nei, ao aga tausili ma mea nei, o i e iloa ai le tagata o lo o i ai tonu le ola auauna. O tatou o le atunu kerisiano, tatou te talitonu i faamanuiauga e ala eseese mai, ae ona o le faasoasoaga ma mea uma, o lea e ala ai ona tuutuu atu le fautuaga i lau Afioga i le Minisita o Aoga aemaise le Afioga i le Palemia, i le faaoloa lelei lea o le galuega a le auaunaga. Ao lea ua taoto nei le Tulafono ina ia mautinoa ua agai i ai. O le fesili lau Afioga i le Minisita ona o lea ua foliga mai o le tua eleele lea ua taoto nei mo le tapenaina o le auaunaga, ae po o ua silasila lau Afioga mo le toeí ..aemaise le faaaogaina o le accredit system mo aoga ia, aemaise aoga ia i Kolisi aua pei lava o le taimi nei o lea e agai le faatinoina i le tele lava i mataupu, ae atonu foi e aoga foi ona seu silasila lau Afioga aemaise foi o le faafofoga mai a le Matagaluega, atonu a o faatasi o le a tele lava se tali mo le tapenaga o a tatou fanau, ona o lava ua taoto aua o le accredit system lava ia o la ua i luga o le Iunivesete, ae ou te talanoa atu ona o le tele o isi atunu la e malolosi o la pei ua agai i ai ina ia mautinoa ua taoto i se tulaga lelei. O le isi vaega atoa o le Tulafono, faafetai o lea ua taoto le alafua mo aoga uma lava. Ua le toe salatua foi la, aemaise le faafofoga mai a Ekalesia o lea faatoa maea le saunoaga a le Palemia, e ese le ttau ina ia mautinoa ua agai tonu lava le aoaoina o a tatou fanau ma ia aua foi ne i i ai ni aoaoga aua e le faigofie. O lenei foi vaitau o lea ua avea i tatou ma sui o le WTO, e mafai lava ona faaofi mai nisi o aoaoga ae i ai nisi aoaoga e le talafeagai ma tatou a o lea ua amata ona taoto le alafua e mafai ai ona limataitaiina ai e o le a aoaoina a tatou fanau mo le lumanai.

**Tulafono Tau Faaofi o Faiaoga 2015**  
**- faitauga faalua**

Ona faaiu atu ai le o le upu a Salega, faafetai tele i lau Afioga i le Minisita ma le Matagaluega mo le tapenaina o le Tulafono Tau Faaofi. Ia manuia le Fono, faafetai.

**FOFOGA FETALAI:** Ou te tapa le sui usufono mo Faleata Sasae ona sosoo ai lea ma se tasi o sui usufono mo Aana Alofi Nu. 1, Afioga Leaupepe Toleafoa Apulu Faafisi ma le sui usufono mo Faleata Sisifo.

**Tofa AVEAU TUALA LEPALE NIKO PALAMO (FaleataSasae):**  
Faafetai lava i lau Afioga i le Fofoga Fatalai. E momoli foi le faafetai i le Afioga i le Minisita ma le Matagaluega e tusa ai o lenei Tulafono Tau Faaofi matagofie. E moni lava foi e pei ona saunoa le Minisita o se Tulafono Tau Faaofi taua tele lea aua le alualu i luma o aoga a le tatou atunuu. E pei lava ona silafia e leai lava se isi o i tatou i totonu o le Maota lenei e le i ui atu i se Faiaoga, e i ai le au Loia, e i ai lou uso lea e nofo i ou autafa, ana leai le faiaoga e le Loia. O le uiga lea o le taua o le galuega a Faiaoga, aua po o le a lava le career po o le galuega e te fia faia i lou olaga ae a e le alu i le faiaoga e te le maua lea manuia. E le o se galuega maualalo la e tilotilo a o se galuega taua. Ia silasila i le Faiaoga aemaise lava totonu o le tatou atunuu e 30 i le 40 tamaiti o le vasega i taimi ia, o Au e le i leva ona ou faiaoga ua ou musu ai i le tigaina o le galuega, a o le 30 i le 40 lea e tatau ona e iloa uma lava mafaufau o tamaiti nei, aua a e le iloa e te leiloa pe faapefear ona aoao, leaga e i ai le tamaititi e poto, e i ai le tamaititi e faale lelei le poto e oo lava i le tamaititi e matua vaivai lava. Afai la lau lesona, e tatau ona e tapena lelei pe faapefear ona e faia le lesona lea ina ia malamalamai ai le tamaititi poto ma malamalamai ai le tamaititi e faale-lelei le mafaufau. E pei ona silafia e i ai tamaiti vaivai i le amataga, e le o se galuega faigofie la ma e tatau ona i ai se metotia ia te oe e te tapena ai i le galuega lea o le Faiaoga, o le taua lena o le galuega. E tatau la i le vaega lea a lelei resources ma lelei mea e faatino ai le galuega ma ia maitau foi e le atunuu o le tele o taimi o fanau a le atunuu o faiaoga, toeititi lava 6-7 itula o le aso e alu ai le tamaititi i le aoga ma faafesagai ma le faiaoga. O le olaga atoa o alo ma fanau a Samoa o faiaoga, leiloa pe tele atu le sao o faiaoga i le aoaoina o le olaga o le tamaititi i lo matua, tulou lava pe a fua i le galuega a le faiaoga. E taua tele le galuega a faiaoga lea ua aumai ai ma le Tulafono Tau Faaofi lenei, aua e tatau foi ona tilotilo le Malo i se auala e faafigofie ai ona faatosina mai alo ma fanau e omai e faiaoga. Ou te iloa o le tasi lea auala e faigata ai i tagata ona o i le aoga, aua o lea e fai mai isi tagata, se o le faiaoga e ta loa le 2:00 malolo. Afai e 30 ó 40 lau vasega, e 30 foi api e te alu ma oe i le fale e maka, ae afai e tolu pe fa mataupu e aoaoina e 120 api e te alu ma oe i le fale e maka ai api nei. O le a la le taimi e te lua ó e sao ai le saunoaga a le Minisita, e leai se taimi e faatasi ai le toeaina ma lona faletua leaga e tatau ona makaina uma api ia usu atu i le taeao ua iloa e le tamaiiti lea o au mea sese uma ia, ia toe aumai fai lau homework . E le o se galuega faigofie la.

**Tulafono Tau Faaofi o Faiaoga 2015**  
**- faitauga faalua**

E faapuupuu lou manatu i le Tulafono Tau Faaofi lenei ua faataatia mai e taua ma manaia, ou te iloa foi o le agaga o lenei Tulafono Tau Faaofi ina ia alualu i luma ma lelei aoga a alo ma fanau. E le o se Tulafono Tau Faaofi faapea e tautaua ai le Faiaoga. E le o se Tulafono Tau Faaofi e milionea ai le Faiaoga, o le Tulafono Tau Faaofi ina ia lelei ai alo ma fanau a Samoa. Ia lelei le aoaoina, lelei le mafaufau e alu ma maua mai ai lana tupe e tausi ai ona matua ma le atunuue ae alu lava le faiaoga e faiaoga ai i nai mea ia e i ai i lenei taimi.

O lea la o le a ou talanoa atu lau Afioga i le Minisita i se vaai faafafaiaoga i totonu o le Tulafono Tau Faaofi, aua e tatau foi ona tatou tilotilo i se auala e faafraigofie ai i faiaoga ona faatino a latou galuega e fua i luga o le Tulafono Tau Faaofi. Afai foi e gaogaosa ma tele ni lavelave e uia e le Faiaoga e lesitala ai, o le tasi foi lea vaega e ono musu ai le tagata e alu e faiaoga, ae tatau ona tagai i ni auala e faafraigofie ai ona faatino lea vaega. O se faataitaiga lau Afioga i le Minisita, o totonu o le Tulafono Tau Faaofi lenei, afai e te apply o le a faamauina oe e totogi lau fee, maua lau certificate ua e lesitala, totogi lau fee, aumai lou laisene e te faiaoga ai ua totogi lau fee, e faatolu ona totogi lau fee ona faatoa mafai lea ona e faiaoga. O lea ou te talosaga atu ai i lau Afioga i le Minisita ma le Matagaluega se i toe tagai ane i lea vaega o le Tulafono Tau Faaofi, pe le lava le tasi o le fee e totogi i le taimi e apply se i oo ane i le taimi ua pasia ai le full lesitala ona lava ai lea i ina. A fua foi i le aofai o faiaoga lea e te tagai i ai e 3,000 ua ova atu lava e le o se tupe faigofie lea o le a faatino ai lea vaega.

O le isi vaega o le Tulafono Tau Faaofi e vaai i ai faafafaiaoga i totonu lau Afioga i le Fofoga Fetalai, o faasalaga nei e molia ai Faiaoga. O totonu o le Tulafono Tau Faaofi, afai e molia le Faiaoga i nisi o vaega o le Tulafono Tau Faaofi o lo o i ai i totonu, a molia la i le Matagaluega o Leoleo ae aumai le tali e leai se moliaga o le tagata lea na avatu. A aumai la i le Komisi e faapena mai le tali a le Matagaluega o Leoleo, ona ave lea e le vaega lenei i le isi vaega i lalo o le Council. E lua vaega ia e fai mai e ave i ai, e ave agai i le PSC, a faapea mai e ave e suesue ona aumai lea ma ave i le Council e toe o e toe suesue, ona filifilia lea e le Council le tagata e alu e toe indicate le vaega lea. Aisea le mea ua tulituliuapuina le faiaoga pe afai ua aumai le iuga a le Komesina ma le Matagaluega o Leoleo ma Falepuipui na latou faatinoina lea vaega fai mai e le molia, pe faaui i tua le talosaga. Afai o le talosaga lea, o le a le mea e le muamua faatino ai le suesuega a le Komisi po o se moliaga e ono ave i Leoleo. O le uiga o lou manatu i le vaega lea lau Afioga i le Minisita, e pei ua le amanaia ai galuega faa-Leoleo, ona o lea ua aumai le talosaga a Leoleo, ou te iloa atonu e i ai se isi vaega na ala ai ona tilotilo le Komisi i le faatinoina o lea vaega e pei ona ou tolaulauina atu.

**Tulafono Tau Faaofi o Faiaoga 2015**  
**- faitauga faalua**

I totonu lava o le faaaluga o le Tulafono Tau Faaofi, malo lava, ou te le tau selu atu i lau Afioga i le Minisita ua leva foi ona e faiaoga, aemaise foi o le mamalu o le Matagaluega, o se Tulafono Tau Faaofi , o se Tulafono Tau Faaofi aoga ma alualu ai i luma aoaoga. O se Tulafono Tau Faaofi foi a lelei ona faatino o le a faatosina mai ai e o lo o fia faiaoga ina ia lelei ai le faatinoina o lenei galuega e pei ona tatou i ai.

Ona pau lea o se manatu puupuu e momoli atu ai le faafetai ma le faamalo i lau Afioga i le Minisita ma le Matagaluega.

**FOFOGA FETALAI:** Tulai mai se tasi o sui usufono mo Aana Alofi Nu. 1, Afioga Leaupepe Toleafoa Apulu Faafisi ona sosoo ai lea ma le sui usufono mo Faleata Sisifo.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai, faafetai mo le avanoa ua mafai ona maua e lenei Itumalo. Sa ou le manatu e faia se manatu i lenei Tulafono Tau Faaofi aoga ae ona ua logo i tino matagi lelei i le maitau ma le faalogologo i le folasaga manino a le Afioga i le Minisita o Aoga, Taaloga ma Aganuu, ua mafua ai le manatu e fai se faamatalaga ma se upu e faafetaia ai le Afioga i le Minisita ma le Matagaluega aemaise o le Pulega, le Afioga i le Ofisa Sili o Pulega ma Ofisa Sili Lagolago a le Matagaluega o Aoga, Taaloga ma Aganuu.

Ua logo i tino matagi lelei, o le upu foi e fai i Atua, ua se togi le seuga laga tila ua faapulou le tualima ua faamalo le fai o le faiva. O le nofoaiga ma fuafuaga lelei e tulai mai ai, o le aso foi ma le filiga, o le fuata foi ma lona lou. O le aumaiga o lenei Tulafono Tau Faaofi, ou te manatu ua matua talafeagai le taimi ua tuuina mai ai ona e fua i le siosiomaga ma fua i lenei vaitau i le soifuaga aoaoina o alo ma fanau. E lagona ai le agaga faafetai ma le agaga faamalo i le Ofisa Sili o Pulega ma le Matagaluega ma lau Afioga i le Minisita ona o lenei Tulafono Tau Faaofi taua ua aliali ai le siitia ma le uunaia o le faaleleia ma le malupuipuia o lenei foi auaunaga taua o le galuega faa-faiaoga i le atunu ma itu eseese uma faapena ua mafai ona maua mai i le Tulafono Tau Faaofi. E le gata o le itu i le malupuipuia o le auaunaga faa-Faiaoga ae faapea foi le siitia ai o tulaga ma le tomai ma le malupuipuia o tiute faa-faiaoga e tusa ai o le latou foi auaunaga. O le tasi lenei tiute ou te manatu o lo o talosia e matua ona o le soifuaga atoa o alo ma fanau a le atunu e faalagolago i le auaunaga faa-faiaoga, ona o lenei vaitau ua tele le suiga e pei ona maitau ai. Ua le gata i le aoaoina o le poto salalau e alo ma fanau a ua faamoemoe foi matua e aoaoina ai amio, o tu ma aga faaleaganuu i le faaaloalo, ua oo lava i le faa-Kerisiano ua faulai i luga o tauau o alii ma tamaitai faiaoga. Ua itiiti lava se galuega o lo o faatino e matua, e ui lava ina faapea o matua o uluai faiaoga i alo ma fanau, a o lau lea maitau i ai ona ou te latalata ó e le o au o se faiaoga pe na ou faiaoga foi, ae ou te latalata i le galuega faa-faiaoga ona o le Komiti o Aoga. O i ina ou te iloa mautinoa ai ma ou te tautala i le mea lea ou te vaai i ai i le galuega faa-faiaoga e le o se galuega faigofie.

**Tulafono Tau Faaofi o Faiaoga 2015**  
**- faiatauga faalua**

O lea ua iu ina saunoa ma malele, ua le natia i fatu alavai le saunoaga manino ma malamalamama a le Afioga i le Minisita, ua oo lava i se tasi o tama ua faaalia lona ó i aafia o aiga ona ua tuutasi le faiva o Pili i le taimi atoa i tina, e aoao ai ma tapenapena ai, aua e le pei o le tele o galuega a uma lava le 8 itula i totonu o le fale faigaluega ona alu loa lea e malolo, a o le galuega lenei e uma le taimi o le galuega i le faleaoga, ona toe foi lea e faaaoga lona taimi atoa e tatau ona malolo ai, a ua faaaoga e tapena ai mo le isi foi aso. O se galuega e le lau maua uma le malosi e mafai ona faatino ai, ou te faafetaia lenei Tulafono Tau Faaofi, e pei ona saunoa nisi o sui usufono ua leva ona tatau ona tuuina mai, a ua ou manatu au, o lea ua talafeagai le taimi. E momoli ai le faafetai i le Afioga i le Minisita, le Ofisa Sili o Pulega ma le Matagaluega ma i latou

aemaise foi i latou o lo o galulue i le Matagaluega i le latou galuega, aua e le faia toatasia, e galulue faatasi ina ia maua mea sili aua le faatinoga o lenei foi auaunaga mo alo ma fanau a le atunu ina ia siitia lo tatou tamaoaiga. Aua e moni lava i le atiaeina o le lauelele, ae o isi e fua i le tatou siosiomaga ua i ai, ua faapena foi ona le manuia, e taumafai atu i le popo, koko ma isi mea faapena e siitia ai le tamaoaiga, ia, ae tele foi auma e faapena ona afaina ai. A o le tamaitiiti atamai i totonu o le aiga, e tulai mai lava pe a maua le alofa, e o faatasi le poto ma le alofa, o i ina o le a manuia ai mea nei o aiga. A manuia aiga, manuia nuu ma Ekalesia, e oo mai lava i le Malo, o le a faapena ona manuia ai le Malo. O le mea la lea e tatau ona tulai atu e faaalia se lagolago a lenei itumalo i le matagofie ma le lelei tapena o lenei Tulafono Tau Faaofi ua tuuina mai e lau Afioga i le Minisita mo Aoga. E momoli foi le faafetai i le Matagaluega ma le Ofisa Sili o Pulega ona o le tapenaga o lenei Tulafono Tau Faaofi.

E momoli atu foi le faafetai, atonu o lea ua faamalieina i se taimi i le lumanai, o le a faamalieina le utiuti o tatou faiaoga ma tomai faapitoa e pei ona manaomia aua le aoaoina o alo ma fanau i le maitau atu i le folasaga a le Afioga i le Minisita, o ia lava mea ua faapena ona tapenaina. O le faafetai puupuu lea, o le sao foi lea o Aana Alofi Nu.1, faapea foi lou uso nei o lo o ma toalua. Ma le faaaloalo. Faafetai.

**Tofa Hon Tuuu Anasii Leota (Siumu):** Lau Afioga i le Fofoga Fetalai, leaga o lea - o se mea e fia faamanino ma faamalamalamama. So o se Tulafono lava e lagolago i ai maua, ona tulai lea o le sui usufono mo Aana Alofi Nu.1, Afioga Hon Leaupepe Toleafoa Apulu Faafisi e faaleo, a o mea e tetee i ai, ona ou tulai lea e faaleo. Ma lou faaaloalo lava.

**FOFOGA FETALAI:** Ia, tulai mai le sui usufono mo Faleata Sisifo e faaiu mai saunoaga i le Tulafono Tau Faaofi.

**Tulafono Tau Faaofi o Faiaoga 2015**  
**- faitauga faalua**

**Tofa LEALAILYEPULE RIMONI AIAFI:** Faafetai lava i lau Afioga mo le avanoa. E le fia nofonofo foi ae fia fai se manatu i le taua o lenei Tulafono Tau Faaofi. E faafetai ai, ou te le faafetai i le Minisita ma le Matagaluega, ae faafetai i le Atua ua foai i ai le poto ma le lototele e fai ai lenei Tulafono Tau Faaofi. Malo. Ae pau lava lau fautuaga i lau Afioga i le Minisita, fai ma faufautua i le faiaoga, e sese le faamuamua, faamuamua le toeaina ma le fanau ona fai ai lea o le meaaoga. A malie le toeaina, lelei le tapuaiga, ua lelei foi le aoga. Ia manatua foi o le faiaoga, pau lea o le tagata a faapea e faiaoga i lona olaga atoa pe 30 tausaga, e sili atu i le afe tamaiti e mafuta i ai le faiaoga. O lona uiga, e leai se isi e sili atu ona tele lona taimi, tele le influence i tagata soifua i lo le faiaoga.

O le auga atoa o le Tulafono Tau Faaofi, o le siitia o le tulaga o faiaoga, faatuina le fono a faiaoga, le council ma se Komisi faamasino po o se tribunal e ave i ai atugaluga o nisi o faiaoga. Faafetai ua tulai mai lenei Tulafono Tau Faaofi taua e faatauaina ai le taua tele o lenei auaunaga o le faiaoga. Aua e le po se lilo, e oo foi i le taimi o ota aoga ita, e pei e le manatu mamafa i le career lea po o le faiaoga, e fia o uma lava e fia isi profession ma isi galuega, ae pei e faamulimuli le faiaoga. Ae faafetai o le tele o le galuega ua faatinoina nei ina ia faataua lenei auaunaga o le faiaoga. O lea ua vaai i le intake po o i latou ua o atu i le NUS ma le Aoga Faafafiaoga, o lea ua amata ona o i ai tagata, nai fanau e faataua lenei auaunaga mo le agai i luma.

A o nai manatu lau Afioga e fesoasoani i le tatou Tulafono Tau Faaofi. Muamua, a faapea mai le Tulafono Tau Faaofi, e taaofai ai faiaoga uma ma so o se tagata e faiaoga i totonu o Samoa, e aofia ai ma aoga tumaoti, ma aoga a Ekalesia. O le fesili lau Afioga i le Minisita, o le naunautaiga e lelei ma talafeagai, a o le faatinoga, po ua i ai i totonu o le Tulafono Tau Faaofi se malosiaga e faamalosia ai aoga a le Ekalesia aemaise mea o aoga tumaoti. Manatua e i ai foi a latou faiga faavae e faatino ai a latou recruitment po o le faafaigaluegaina o a latou tagata.

O le isi vaega, o le toatele o i latou o le a aafia. O le isi vaega taua lau Afioga lea na saunoa i ai nisi o sui usufono, ae faapefea i latou o lo o fai aoga afiafi, e le o faiaoga, o la e galulue lava latou i isi galuega a o lo o fai a latou aoga afiafi, i latou foi ia ua tapa mai i ai nisi o kolisi mai lea taimi i lea taimi ona e i ai lo latou poto faapitoa, e o atu e faiaoga part time. O le isi vaega, o i latou nei ua iu mai fafo ma nisi faailoga, aua o le mea sa i ai, e mafai lava ona e iu mai fafo ma lou faailoga lea o le BA po o le BSC, e mafai lava ona e sau loa e faiaoga. O lona uiga la i lalo o le Tulafono Tau Faaofi lenei, e moomia oe e te toe alu e te aoga faafafiaoga pe afai e sao lau faitau. Po o le a la le umi e toe alu ai le tagata lenei e toe aoga, pe le avea lena ma auala e faamaamulu pe faavaivai ai lea tagata mai le alu e aoga faafafiaoga. Pe le mafai ona ave i ai le resitala e faiaoga loa ma train, fai ana training po o aoaoga ia faavaitaimi, ina ia maua ai le vaega lea. Aua o lona uiga, o le a maumau ai foi lea vaega. O le toatele foi o tatou i le Palemene e oo foi i le Afioga i le Palemia, sa faiaoga po i aso ia, e le i moomia vaega ia, ae manatua, e taua, pe faapefea la i lalo o le Tulafono Tau Faaofi lenei lau Afioga i le Minisita.

**Tulafono Tau Faaofi o Faiaoga 2015**  
**- faitauga faalua**

O le isi vaega, o le Komisi lea ua faatu, ma galuega ia e foufou mai e faatino ma le tele o faiaoga, o se matua galuega tele. E moomia se ... ou te talitonu e moomia ni tagata faapitoa e faigaluega, na o le pau lea o le latou galuega e fai, aua o le Council, o lea e i ai Faaululuga o Matagaluega ma nisi o tagata o lo o faiaoga, ae o galuega ia e moomia ona faatino o le matua tele lava i lau tilotilo. Po o i ai la se itutino o le a faatuina latou te tapenaina ma faatino galuega nei, ia oo i le taimi e fono ai le Council ua maea mea nei. Aua o lea e sau i le Tulafono Tau Faaofi, na o le faatasi ona fono o le Council e tai lua masina ma fono. O lona uiga na o le ono fono i le tausaga pe a moomia i lalo o le Tulafono Tau Faaofi. A o galuega ia e fuafua mai e faatino, ia e fai lava si tele. Ae tele foi galuega a i latou ia o lo o aafia e lavea ai.

O le isi vaega lau Afioga, o fees, ona e le o aumaia e le Tulafono Tau Faaofi po o le a se ata faataitai, aua o lea e aumai tai tolu tausaga ma toe faafou. Pe le mafai ona tai lima tausaga ma toe iloilo, a o le a se totogi e totogi ai, ina ia aua ne i avea ma mea e augatatai ai tagata e omai e faatino lenei vaega taua. E tatau pea ona tagai i ai le Komiti i se tau talafeagai aua ia manatua foi o le toatele o latou nei sa aooga, o la e foi sa totogi o latou pili ma tulaga faapena ina ia fesoasoani ai mo le agai i luma.

O le isi vaega taua lau Afioga i le Tulafono Tau Faaofi, sa ou faapea, e aumai ai i i ma le aiatatau a nai faiaoga i le puipuga foi o le latou galuega ma le latou aiatatau, ona o le taimi lenei, ua faigata foi le galuega faafaaiaoga, ua le iloa foi e nai faiaoga po o le a le ituaiga faiga e fai ai tamaiti. O le tele o tamaiti ma ni amioga ua tatou vaavaai ma faalogologo i ai, o ni amioga ma ni aga e le masani ai tatou. Afai foi la ua mao i ai le sasa a le faiaoga, e fai o le o atu o le aiga, ua le iloa e si faiaoga po o fea a sulu i ai. E tatau ona i ai ni aiaiga foi nei mo le puipuiga o nai faiaoga i mea nei, aua o le tele o le mea lea e i ai, ua le sasaina fanau a matua, ae faamoemoe e sasa e faiaoga ma aoai. Ae le o se galuega lena a faiaoga, o le faiaoga ia na o le aoaoina lava o le poto salalau, a o le amio, e ao mai le fale e le matua ia lana fanau. A o le mea lena o lea e tupu, i nai faiaoga ma nei taimi faigata o nei tupulaga, aua e tatau foi ona i ai nai puipuiga mo nai faiaoga nei. Aua a ta faalogo i ai i le mafuaaga e ala ai ona fasi e isi faiaoga tamaiti aoga, a na o au foi lena, ou te faia foi le mea lena. E le mafai ona ou onosaia ituaiga amioga faapea e le masani ai tatou. O le...

**FOFOGA FETALAI:** E faamalulu atu i le saunoaga a le sui usufono mamalu, e manatu o lea ua logomalie tuleiga ma saunoaga aemaise foi o saunoaga e ala i le Tulafono Tau Faaofi. Ae ou te talitonu ona o lea ua tatou taunu i le taimi malolo. E i ai le manatu o le a tuu atu le avanoa i lau Afioga pe a tatou toe taliu mai i le aso a taeao. E momoli atu le faafetai tele i le paia ma le mamalu o le tatou Maota i lenei vaega o le aso. E momoli atu le faamalo ma le faafetai e ala i le tauavagameaina o le tatou Fonotaga mai le taeao analaile. E talitonu o lea ua tatou tini tauao i le tatou taimi malolo i lenei aso, malo le usufono, malo saunoa, malo fetalai, malo malele. E talitonu ua tele ma anoanoai le tatou galuega mai le taeao seja oo mai i lenei taimi.

### **Isi Faasasilaga a le Fofoga Fatalai**

E le faaititia ai le agaga o le faafetai atu. E i ai le talitonuga o le a tatou sailili malosi mo le aso a taeao. O le a faia le tatou malologa, ona tatou toe taliu mai lea i le tatou taimi masani. E momoli atu le faafetai i lenei itula o le aso.

E momoli atu foi le faafetai i le faafogaga mai a le tatou atunuu o lo o tui mai pea le mulipapaga aemaise o le tapuaia o le alofaiva a lou Palemene aua le tatou Fonousu i lenei foi masina. Malo le onosai, faafetai fai tatalo e ala i le Aufaigaluega Paia a le Atua.

### **ISI FAASILASILAGA A LE FOFOGA FATALAI**

**FOFOGA FATALAI:** Ou te talosaga atu ma le agaga faaaloalo i le Komiti o Galuega, Tulafono Tumau, Maota Fono ma Mataupu Tau Faiga Palota o le a faia le tatou fono i le potu malolo o le Fofoga Fatalai i le maota nei, i le maea ai o le tatou Fono lenei.

A o le i tolopoina le tatou Fono, e faafetai atu foi i Faauluuluga o Matagaluega ma Faalapotopotoga a le Malo ua tatou aufaatasi i lenei aso, aemaise o le Ofisa Faasalalau ma le latou foi matafaioi fai. Ou te tapa ai lau Afiofa i le sui usufono mo Gagaifomauga Nu.1 e tulai mai e fai se tatou tatalo ona tatou malolo ai lea.

*Na tolopo Tauualumaga a le Fono Aoao i le itula e 1:04 i le aoauli sia aulia le itula e 9:00 i le taeao o le Aso Faraile, 20 Mati 2015.*